

钦定四库全书

集部五

学言诗稿

别集类四

元

提要

（臣）等谨案学言诗稿六卷元吴当撰当字伯尚崇仁人澄之孙也以荫授万亿四库照磨荐为国子助教预修宋辽金三史除翰林修撰累迁直学士江南兵起拜江西肃政廉放使左迁抚州路总管旋罢归后复擢江西行省参知政事未上官而陈友谅已陷江西遂匿迹不出友谅遣人召之当以坚卧以死自誓舁床载送江州拘留一年终不屈友谅灭乃免洪武初复迫致之见太祖长揖不拜竟得放归隐居吉水之谷坪完节以终所著有周礼纂言今已佚惟此集存原本九卷明崇仁知县新安叶良贵所刊此本六卷则国朝临川李绂重刊所并也澄子元代致位通显号曰太儒然实宋咸淳乡贡士出处之间犹不免责备于贤者当不受僭窃之辟则高于张宪诸人乃天下已定仍不降礼于万乘尤在杨维桢诸人上盖死生久付之度外其不为谢枋得者特天幸耳有元遗老当其最矫矫乎其诗风格遒健忠义之气凜然如生亦元季之翹楚顾嗣立元百家诗仅摭甘浚阳舟中诗三首送樊秀才诗一首附澄草庐集末其殆未见此本欤

乾隆四十三年五月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

●钦定四库全书

学言稿卷一

（元）吴当 撰

○四言诗

明良诗

御史明良赐都棱特穆尔开府为字乃东平文忠王拜珠丞相之子忠宣王安丞相之孙也

于赫皇祖肇基朔土惟时忠襄实佐神武
天戈攸指罔不率俾忠武之才雄特瑰伟
逮乎忠宣相我世皇式开治平统一万方
猗与文忠礼乐是式克赞英庙以匡以翼
硕硕元勲后先四王维君之明维臣之良
侃侃开府尚德象贤承厥父祖佛时仔肩
惟皇之念翰墨是锡倅尔嘉名休光有奕

云汉于昭发耀天藻垂美无疆永以为珤
翼翼厥明终始典学陈善责难世臣攸托
以道事君汝翼汝为股肱左右庶底缉熙
明良之逢有典有则世笃忠贞式报天德
右十一章章四句

恒德斋为开府明良公作

于穆天命恒久不已往禅来续与道为体
惟圣有德率性之常不二不杂悠久无疆
君子是则勉勉不息终始弗渝夙夜无斁
赫赫元勲昔佐皇祖配德惟一永锡胤祚
侃侃闻孙靖共在位式谨尔常以赞天子
佩舄雍雍退食自公肃慎斋居用省厥躬
协于克一责难将美征其化成万国咸理
惟巽而动勿承以羞亿万斯年于昭匹休
右八章章四句

极高明亭诗为曾以敬作

春木载荣朝阳孔曦悠悠白云华盖之西
爰有新亭翼翼中峙式究尔宁君子攸止
其止维何朝弦莫歌道其问学弗辟弗颇
斯道之着皎焉日星发育峻极敛之灵扃
弥纶六合迴绝寥廓周知旁行卓彼先觉
如俯层台洞视靡遗如持悬鉴罔有蔽亏
知崇效天礼卑法地成性之存内外交致
万物毕脩一贯斯全参乎有唯思也是传
予忝承学子实名裔自顾无闻祇用生愧
惟博反约实基三省敢曰尚友愿以自警
右十章章四句

庆原堂诗为萍乡刘氏作

惟楚萍乡邑里有堂繁昔刘氏肇基于唐
雄虎之台郁郁丘土其伏未耀本干深固
子孙多贤冠佩蝉联积善储和泝流而源
福庆之实既坚既栗晔晔灵芝毓秀于室
歷宋而元流庆未已袒免同居表德闾里
山冢之迁有霆有雷尚复多祉源源其来

奕奕君子实居后麓既休既宁以踵芳躅
绳绳厥承忠厚之教庶其绍之以食斯报
太史有记邦人足征式勗来嗣勒诗尔楹
右九章章四句

咸阳王功德诗

在昔皇祖有赫神武维忠宣王杰出西土
佐命而兴来受圭组宪宗伐蜀徃补戎伍
于穆世皇天戈载扬亲拔云南用遏蛮方
滇之宗臣乃悖纪纲复叛不顺袭盗以狂
天子曰嘻孰称予使爰命忠惠以绥以抚
谕之恩信涤汝烦苦简节疏目咸得理所
乃疆乃理奠尔城邑市有居货屋有陶甓
我田我池杭稔黍稷训厥士女污俗斯革
既庶既富建学立教笾豆鼓钟于乐孔庙
诗书歌弦孰则孰效折其狂獬笃尔忠孝
步不出国侯幽侯深部曲联绎干戈若林
久而弥孚向义骏骏锡贡无已大賂南金
天祚皇国克生伟人历年孔多以福逺民
逺民之安克顺克正惟王之贤天子之圣
元臣云亡逺民孔哀风马云车曷往曷来
新庙既作执事有恪王其享兹用配诸葛
锡爵启封皇则悼之嗣德象贤天实报之
诎诎孙子有引无替太史作诗式昭永世
右十八章章四句

性乐堂诗

繄厥成性浩然其天灵明洞彻溥博渊泉万物毕脩众善具全反身而诚乐莫大焉
惟尔学者夙夜有恪循端致曲实充实扩昭兹本善以踵先觉观其回通亦底克乐
翼翼高堂攸介攸宁天光丕容匪间显冥灼之当为勇往是程其则不逺勒诗在楹
右三章章八句

集义斋诗为太行高氏作

瞻彼嘉木太行之阴盘盘幽谷侃侃素心
緬焉兴懷古道是式惟心之宜至当有则
我其扩之制事不违用达万变审乎先几
灼知勇为乃积乃充无间微显集于厥躬

浩然之生实匪助长天地之塞吾体同量
肃尔斋居永端于初必有事焉昭昭圣谟
右六章章四句

致亭诗

致亭大宗伯兗人王公之所构也公字致道又以致名其亭大夫君子咸取古训绎其义辞既悉矣予不得袭言焉故赋以美之且自勗也

瞻彼绎山绵绵其麓爰有君子乐尔贞卜有倬斯亭荫此嘉木悠悠永歌衍衍春服
先民有觉昧兹寡闻我其致之匪学曷敦问辨言析反思其存焕若融彻大明初曦
顾瞻周行玄邈奚绪曷其致之惟圣有矩我车既坚我马孔阜无远弗至式穀尔御
滴彼川流昼夜斯逝邈邈无端原原无已于惟缉熙不杂不二我是用希夙夜敬止
既种既耨廩积孔殷既狩既猎鼎餼具陈秩秩大猷俛焉日新勗尔尚友予亦何人
右五章章八句

修省斋诗

惟皇降衷弗怙弗亏习远情肆始沦以隳
有卓君子励行自修夙夜惕若反躬是求
孰去孰存惟日内省百罅勿遗靡伺靡骋
修省之始尤慎在独勇绝其萌庶制尔欲
于赫斯临昭昭幽深毋苟自欺其敢弗钦
矧兹明威曷敢戏豫战兢自持主一无二
燕居观象恒若洊雷益慎益戒万善具来
审之靡疚式底于完信立愿达克承克安
吾侪小人贪欲内锢甘心物欲有寐有寤
为之由己曷自暴弃呜呼灵台幸勗尔志
右十章章四句

寿寧堂诗为冀寧耿氏作

于昭秉彝有本有支立爱惟亲万善是基
衍衍令子报德慈母菀兹堂构有翼其宇
鱼轩戾止兄弟具在执礼循循百福攸介
旨甘孔时春酒载筵天锡纯嘏眉寿永年
哺乌在林遗我好音起处攸寧式慰母心
琴瑟静好以雅以南式歌且舞朱衣华簪
既曰寿只实在寧只夙夜清温庶其敬止
敦孝移忠永锡不匮矢诗孔扬以勗来裔
右八章章四句

学言稿卷一

●钦定四库全书

学言稿卷二

（元）吴当 撰

○五言古诗

四月朔都门别友

昨日送春归今朝送君去君去几时来春归向何处都门柳千行晴空正飞絮祇恐
尊酒空离情渺无据

拂云堂

修竹临绿水高堂散清阴猗猗岁寒操皎皎君子心不承春阳媚已觉秋露深仰止
云汉上高节慎所任

凤冈隐居

凤凰千仞冈中有隐者庐流水绕屋下青山当座隅邻曲不在多聊可共耕锄种菊
秋露重斲花春雨余

松下挥鸣弦凉风满庭除振衣红尘表濯缨清水渠虚名果何益此乐将焉如伊人
幸同姓行矣巾吾车

送刘山人远游

初夏风日清芳华尽披委萧萧野人居绿树净如洗繁阴在庭户晴云隔窗纸刘君
负绝艺幽讨亦戾止平生一舸履歷歷几千里南袖岭峤烟东拂扶桑水空斋坐终日论
议颇亹亹言立罔迷真浩瀚况无已羣流会一原众辙不殊轨昆仑倚西极黄河走其底
嵩华与恒岱郁郁土中峙休气蓄灵光自惜伯玉址结交燕赵豪跃马长杨里堂堂百年
身兹游更奇伟酌酒浇壮怀奋步从此始

送曾冲衍自甥馆归省

慨我林壑姿高思凌云烟清秋到城邑兼旬得留连耆旧颇凋谢新知多少年曾君
金川彦胤胄本蝉联华媚照高阁玉树来鸾鹄自小涉书史已能缀诗篇相值闾闾间被
服华且鲜间亦能我即辞气自温妍而翁富文学传家有渊源十年不相见使我心惓惓
奇骨出名驹风采固超然尔邑危处士其人菰且贤词高连城价字重青瑶镌汝能早入
室累岁相周旋吾闻古人学忠信盖所先彝伦本日用昭著无幽玄本干既有立华实自
芬蕃愿言勤孝弟余力及艺文友道贵贵善我歌匪虚言

同诸彦泛舟游

移舟荡绿水棹击来清风山树接天碧汀花向日红圭璋益良朋羣簪得相从窈窕
杨柳外逶迤墟里东微雨洒芳郊流水度晴虹渔歌日暮起清响紫烟中

九日江楼分韵赋采字

江上秋风多客里时序改嘉菊空满目幽香为谁采江楼对西山物景颇潇洒山云

寒冉冉汀树晴蔼蔼何以慰今朝浊醪向邻买野馔在盘飧梨栗杂醯醢睠兹二三友被服盛兰茝举棹送飞鸿翩翩望沧海

赋灵碧石山子

卷石重拱壁致之果何从隠几当翠微娟娟秀芙蓉艮岳玄雾温香炉紫烟重五老不可见令我忆鳌峰

送吾安之令渤海县

奉诏出高阙驱车向长河长河正奔崩大野仍横戈宵衣动深忧频岁秋无禾今君宰渤海敷政当如何上以畅皇惠下以拯民疴清宫执道要直气排洄波东郊散壶榼月户鸣机梭境内鸡犬静垄头牛马多遊人若云环窈室皆春和遄归赞天纬报最无蹉跎

汪氏桃溪先业

种桃作春华插柳被涧阿飞梁度窈窕峭壁缠烟萝遊息各有地简编足吟哦宜有遯世者看云时一过先庐倚丘坟岁晏伤如何

送丑时中安陆知府

烝庶日凋敝久貽宵旰忧中原有斗格陋室仍诛求又闻大河奔无复桑田收羣情自瞽瞍时论空悠悠下诏选朝士传声典方州及兹数年来令牧颇清修皇帝威信布膏泽亦下流用副民社寄庶答廊庙谋君才已歴试儒术素所优寒露承冰壶黄锺播天球楚郢古名邦廛市接车舟人多尚遊販野有良田畴坐令书牒稀行见疮痍瘳香凝檠戟静雨洽桑麻稠问俗在抚摩敷政尚懷柔三年屡丰穰五袴成歌讴最书举劳绩归来奏宸旒

送李伯微山东廉使赋华不注峯

华峰秀亭亭缥缈风雨会湖光纳空翠元气蓄冥昧云来泰山颠日出方丈外孤根奠地轴万木动天籁危攀望不极高致君应最使节无滞留都人仰旌旆

送赵大本西台御史得一字

关陕古雄都四塞若天室圣人物土贡沃壤称第一皇威极西邮声教无遠昵崇台揽纪纲郡国底宁谧赵君金闺彦楚楚冰玉质出身翰墨场已执太史笔朝裁惠文冠夕策长亭驂弭节都门道供帐集簪鞞朔风吹秦陇岳色寒崧崧泾渭扬浊清河水相荡潏皇皇霜简动肃肃绣衣出丈夫报国心重在理仁术矧兹圣明时布衣靡闕失胡为守牧宰往往败绳律饥渴剧饫饕民隠詎遑恤岂无循良才众丑成妬嫉遂令白黑挠惩劝恒过实周询待摩抚伺察到微密于焉振风采勿使废穀率遄归报明廷烟柳动春日

西屿书堂

高堂在西屿积水宜清秋飞梁接广衍松竹何翛翛草色洲渚净书声庭户幽美人水苍佩公子木兰舟及兹且容与乐哉以忘忧

横州新城

守国设险阨由来固金汤天下已一家四海无封疆邊夷失摩抚虚邑奔豺狼横州

两江上妖氛日相望烈烈四野焚哀哀万民疮倪君列半刺为政古循良及兹幸辑睦庶以安苍黄兵威尚形势邦本资堤防版筑不辞劳恩波浩难量神功实天相良璧发地藏遂令千年间集此百雉强坐见云鸟陴居然山水乡峩超楼櫓迢逖蟠池隍落日笳鼓壮寒风旌旆扬麈区表井里公馆临康莊蔼蔼闻士誉熙熙浹时康从兹慎备御奚用多鬪伤长松在涧底至宝委道傍鸾栖自枳棘鹓路空翱翔谁持太史书为贡白玉堂

谢灵运小像

达人不偶俗穷乃托遐踪海上采石华山头接云松旷情凌霄外长笑紫烟重白驹不可縶矫若人中龙世诋道已微君子固有穷多才竟为累寡立复谁从凄凉贝锦诗千载仍忪忪

兰石竹树图

光风被丛兰秀气何绸缪竹树露已深萧萧苔石幽亦有纫佩者蘋芳在中洲含情欲谁寄湘水何悠悠

渊明图

窈窕墟里烟崎岖抚遐踪松菊在三径归来事春农乘化乐天命千古垂高风

菊泉轩

种菊秋水上泉甘花更妍掇英挹朝露牵萝媚清涟衡门幽且闲沦迹托贞坚浊酒有深趣乐哉以忘年

送立道

清笳动城阙落叶响空井羈客增远懷繁霜集寒景依依塞鸿度杳杳江路永昨夜梦沧洲朝来理烟艇

送无悦上人归高句骊

折芦渡海水诸方记遐踪东穷会稽岭南登祝融峰赤城霞绮多香炉紫烟重平生几緉屐伴此九节筇昨者来阙下祇园忆相逢燕坐永夜灯翻经清曙钟一彻了空寂真际何从容法云散天华珠光起神龙上人既东归正法信有宗亦欲乘桴行同心幸相从

云林图

吾邦宅冲奥盘礴元气会峩峩临川山遐眺八极外日月有耿光万象破冥昧云林隔沧洲秀色翼华盖岩桂芳未歇青霞宜有待愿息轩冕游睠兹岁年改

寄题周炼师云台真馆

亭亭云台山重阜隱深廓神宫辟龙虎秀色今绵邈真馆依青林涧水傍虚阁种竹春雾重刊松晴雪落高敞自无为幽旷各有托时见白云闲为雨出城郭岂知有道者元化在机握相从赤松遊不为慕灵药愧我烦世虑睠然仰冥漠考盘能自引随遇有真乐园绮如可期共尔戒归鹤

赋谦斋

为山郁穹窿乃处厚地中君子有令德逊志息微躬种菊春雨洽纫兰秋露浓斋居

玩易象素履慎初终

赋渊明归来图送致仕者

苍苍庐山阳渺渺彭蠡东依依柴桑里矫矫靖节翁聊为三径资出宰古县中折腰未为辱自睠菊与松幡然赋归来高眠北窗风素琴既无弦尊酒亦屡空篮舆入净社植杖随春农逍遥有真乐畴能继其踪君生千载后出处慎初终解印返故山栖此环堵宫作图励薄俗相与传无穷

送胡宗悦官长沙

五夜霜露集秋风起城头出门送行客对酒总离忧红树接郊甸白苹满汀洲南望长沙云湘水寒悠悠

委羽山潘氏隐居

天台几千仞秀色浮苍穹下有委羽山迢迢赤城东晴湍激飞瀑灵鹊巢长松睠彼遗世士诛茅白云通筑室倚飞霞开轩待清风种菊充糗粮插槿当垣墉孤高性所玩夷旷思无穷击壤节酣歌据石抚丝桐迁俗幸无累寡欲不期丰谁刊蒋诩径庶躐羊求踪予将息尘鞍赏心冀能同

高氏新构大行书院

嵯峨大行东陵麓正延广池河发芳滋耕凿乐膏壤之子慎素履义路思独往黄宫宅幽贞神宇肃弘敞空翠在庭户嘉木日以长荐豆不违矩奠席歛来享童冠列春服歌弦发清响古学贵得师景行属高仰车马远可致山水良足赏焉得挂朝衣为尔息尘鞅

琴鹤双清亭【并序】

马君九霄作亭豫章城居之东北隅以贮琴书其祖御史大夫覃国公始居于斯及今仕於斯者三世矣覃国贵而能贫太常易名清猷与宋贤赵公同谥清猷凡仕所至惟琴鹤相随九霄遂以琴鹤双清名亭云

结亭绝嚣尘窈窕北堂东新竹雨满林老树云半空开轩纳归鹤据石理丝桐昔贤尚高洁以此随行踪尔祖罄遐思坚贞副深衷锡谥既有尚素心谅能同水木托本源芳润信无穷大雅继宏响遗书满庭中工歌赞前勋述德宁有终何时戒仙驭抚席聆仙风送桂道士

桂子懷武夷翩翩向东粤褰云采石华着屐踏海月我昔留豫章尔祖尤清狂高居太古楼呼酒时飞觞一别上京国屡献匡时策桃李漫成蹊秋风改颜色持节拥貔貅干戈徧南州誓将扫氛祲少纾黄屋忧流云翳太清谪宦向江城忆听西山雨对酒写离情羨子神仙器去击沧浪桡不辞行路难独鹤思凌厉青山九曲溪每曲可幽栖日暮棹歌里劍光起虹霓仰挹浮丘袂俯流贾生涕真隱倘相逢为述烟霞志

丛桂轩九日书懷

桂树得秋雨清芬散余葩嘉节百感集寒菊不见花尘爵幸未虚鄉山久无家悠悠任天运兀兀展物华仲尼不复梦夷齐何怨嗟岂无西山薇亦有东陵瓜贞心谅谁同良

友各天涯张鷟使絕域能驾寻河槎陶潜愿躬耕早命归田车我独伤局促爱兹絕纷哗
方期煮白石对君引流霞

灯夕

千山动残寒万里有积雪云影互往还江光乍明灭居人灯火寂城堞笳鼓歇忧端
感时序取酒消愤结

送李黼修撰以早请祷代祀嵩衡淮海

帝命修羣祀天香播八埏春秋王正月歷数史逾年云汉忧时切皇华遣使贤鳌头
金榜客鹤背玉堂仙授节来三殿传宣下九天百年周礼乐万国禹山川冠冕移班序车
书际幅员淮流桐栢导岳影外方连望秩严稽典相诚遠致虔过家娱采服聚德焕奎躔
紫气浮燕蓟青郊接涧瀍杂花旂茝茝芳草马翩翩鱼佩横雕玉蛟绡细织涎暮云低楚
树春水涨吴舡瀚海飞龙外衡阳落鴈邊祠官罗鼎俎庭石丽牲牷降裸先明齐登歌间
宿县合萧馨黍稷沈璧达渊泉圭币黄金藉文章琬琰镌幽灵瞻盼向纯嘏锡绵延麻麦
千郊雨弦歌万里烟底今民物阜无复岁时愆问俗裨皇政封章进御筵大夫勤奉职汗
竹纪长篇

天厯初元京师之变大兴军旅中外皇皇遄闻顺附诛放奸臣朝廷清明海宇寧一
皇帝神圣郊天告庙躬行典礼酬功报力恩泽周溥大有涤濯仁施滂沛百官称庆宾筵
秩秩进贤去邪皆繇睿断太平之运适符於今草野愚臣谨摭所闻着为歌咏以称述盛
德愧辞语芜謏不足备太史之采传示久遠云尔共八十韵

社稷初闻变朝廷欲托孤羣情迎代邸至德辟勾吴大业中兴主方輿混一图威声
通海岱神采动江湖邮传三千里舟车百万夫共知尊帝统犹或窃兵符政体萧曹辅权
纲耿贾扶天机开武略相国发雄谟未足烦游刃惟宜破大軋先锋初出銳全阵已摧枯
义正师无敌城降戒不屠乾坤司化育民物尽昭苏颂祷千官集朝宗万国孚勲庸荣
阅社土赐茅菹隱惻纶音切优嘉宠数殊酬功颁府藏怜死恤妻孥始觉埃垞静遄闻
沛泽敷近圻仍给复内郡悉蠲租宥自深仁施情矜旧染沔廛征随划涤縲紲遽欢呼
玉烛调苍律阳和转碧芜祥开山出瓮瑞应火流乌会合寧非数休祲信不诬淳风还
揖让彝训协都俞公器岩廊备卿材柱石须合袂登袞袞览德下于于褭甲寧论武紬
书半用儒步聯青琐闥坐列锦氍毹金马天门邃铜驼御路迂考耆视褫襦报事享
郊雩牢醴周彝鼎粢盛夏璚瑚祀皆稽典礼诚岂荐潢污宗社金为室庭碑玉琢趺乐
县通夕展宸席鄉南铺舞羽虞韶奏包茅楚匭输裸将流柜鬯篋实瘞璜瑜拜俯冠裳
肃周旋组绶纓嘉生光宇宙纯嘏接方隅使者香奩出祠官驿骑徂兆坛尊岳渎列時
及豳鄜治即阴阳正时应水旱无纷纭修贡篚容易弃关繻价重连城璧雄夸照乘
珠祥麟郊薮兽神骏渥洼驹航海期王会通城乐赐酺异材征楚晋良鍛产鍔铍户版
三年计农田九穀需经邦平赋斂充府别精粗势迈唐中叶功高汉两都皇猷垂后
则祖宪重前模接迹风云会迎恩雨露衢春旗标禁卫晓箭通宫壶班序崇鸳鹭华裾
贱貉■〈彳 俞〉阁中羣玉署殿外执

金吾饌启黄羊圈香浮白兽炉宫腰齐窈窕官瓮杂醍醐鲜脍银丝脆驼峯翠釜腴芳馐
调芍药珍鼎荐淳母优戲停丝竹殊音备越胡柳塘朝潋灩花坞夕模糊酬酢频倾倒绸
缪极燕娱时方登俊义人自屏奸谀济济星辰履茫茫造化枢词场尊贾马艺苑薄杨卢
大雅风仍朴羣黎俗不渝栖岩思矫首报国誓捐躯丕显传千载重光耀八区封功登泰
华铭刻到衡巫可谓巍巍矣真能郁郁乎丘园思孔孟耕钓慕唐虞立德期深造从心矩
弗踰承家思绍述笃学谨须臾忠欲绳芳躅身惟养硕肤简编时讲受菽水日欢愉气郁
丰城剑风留渤海桴夕歌樵涧谷晨耒稼泥涂不效微生直难从荷蕢逋陈诗堪作颂拟
赋漫操觚众已趋时进吾犹待价沽摠忠遭盛际谏吉奋长途

予有京师之役十月三日诸君子祖饯章江门行舟阻南征军士未发对景书懷以
答厚意

城郭寒空迴舟航晚景移故人从此别对酒忍相离漠漠孤灯遠依依去棹迟碧天
新月夕红树乱云时灯火渔家市钲铙虎士旗近闻炎海变颇觉羽书驰云鸟初成阵戈
船不失期万方真混一独立尚愚痴不杀遵神武深仁仰圣慈朝廷方有道雨露自无私
厯数千年会冠裳万国仪元勲虽若狷道脉仅如丝社稷斯民寄经纶实尔资春袍金错
鳳朝佩玉横螭未抗匡时疏寧论喻蜀辞转输何惻惻刀剑漫差差自信无遗算谁知有
我师物情何惨切治道尚磷緇疏懒忘身拙苍茫望国思祇慚岩穴陋岂是庙廊姿公等
俱称杰吾徒漫欲为龙纹尘未拂豹隱雾初披菽粟心犹淡松筠晚更宜吁谟求稷契礼
乐讲皋夔祖训须垂后皇猷慎所持未能期共達何以报先施踏雪燕台上看云野水湄
致君心惨惨望遠目■〈目祭〉■〈目祭〉奎壁中台动撈罗四海遺回春端可待藏
器又何疑颖颖囊锥脱温温璞玉奇盍簪求旧德傾盖結新知白雪終難和青山且自頤
臨分勿洒泪努力各相規

浦江郑氏义门

故国衣冠地名家孝义门同居今九叶袭德又诸孙时荐严宗祐晨叅列弟昆周旋
俱典则辞气总清温里閨尊儒素閨门戒妇言承顏惟岂弟服礼自朝昏籍甚羣公誉猗
欵薄俗敦邻饥调粟布客至饋牢殮置驿遺風旧传經古意存夜灯书滿屋秋气稻連村
褒奏归廷议桓楹表國恩后人方食报逸翮藹高鶩从此公侯复終期福祉蕃五云來岳
鳳六月起溟鵬

送丁太初温州蒙古字学正

国字崇当代人才起妙年风云千里骏日月九重天翰苑司抡选中书属次铨光荣
毛义檄奋发祖生鞭学广儒宫制书传弟子员宦情依冷櫟官舍拥寒毡筮仕无踰此如
君更颖然永嘉今壮辟多艺夙称贤咨访兼留意英髦孰接肩旧家疑寂寞遺簡想流传
必使声华盛应知学业全高情何特达胜日共周旋荐豆登霜柚充庖載海鮮洞箫吹月
下玉树立风前已兆魚龍化何嫌雨露偏羣公爭荐进拭目去翩翩

題丁县令禱雨記后

丙子岁旱邑宰丁侯躬迎仙临川山又起龙湫乃得大雨学士虞公为书苏公喜雨亭记复序其事以遗之

方夏时苗盛恒阳岁事愆皇皇良宰念秩秩祷祠虔牲币修羣祀旌幢拥列仙幽穿青涧底危陟白云颠清庙神来只瑶台夜肃然月生丹井露雾湿石炉烟肸鬻期真觐精诚彻邈玄蛟龙盘窟宅圭璧達渊泉甘澍随车至灵飙卷旆旋为霖因往日行潦及前川吏治能无愧农功屡有年弦歌春蔼蔼民物思绵绵已觉讴吟溢惟令翰墨传昔贤曾志喜太史续雄篇

趋京道逢刘簿赋诗赠之

好山青拥县咫尺野人居佐政纡才杰承流畏简书仙鳧飞向日瑞鹤远随车家自簪纓盛心犹玉雪如丰姿瞻岂弟马迹歷崎嶇光接郎官宿声传禁直庐茅茨驯燕雀山泽老樵渔倾盖论交晚维舟上国初广输河润远沾溉晋波余对酒春生坐调琴月满除云开龙影动江阔鴈行疏别后能相忆裁书为起予

守冻徐州腊月八日大雪与贰守秦侯及同馆生联句侯许携酒共赏违期不至遂拾余韵以赋残雪凡联句已用者置不取

故国徐城壮崇台楚骑骁豪华虽寂寂名物尚翘翘游士宾王日羣农祭腊朝冻流胶舫艣寒木寄鸛鷀三尺冬堪瑞经旬气未销太平还有象景色苦相撩发耀因明月凝威借怒飙深藏寻隱曲厚积上嶢峣阴瓦千塍玉珍甃六合窑中规仍毁壁塗槁尚敷僚向日潜生魄迎暉颇沃焦危峰明带縞疎柳弱垂髫甸壤疑翻鹵堂皇讶长硝艸银坚出冶灰蜃盛涂■〈车兆〉委壑终含垢流澌始觉熇时和调玉烛阳律长葭萧秋思抽梁赋民情慕角招休征自有瑞纯嘏贵能徼同乐期重赏賡歌视不佻履穿东郭倩烏赐尚方乔旅馆时操翰华裾每驻鑣饮倾金错落醉拂锦妖娆逸思翀霄鹤羈情在鞢鵑危言能有采庶不愧乌莛

河西李氏孝义旌门

邦人推厚德天语表高门自昔干戈集于今孝友敦振振生八世蛰蛰又诸孙世已朱轮贵颜如白玉温承家深雨露制行谨朝昏粟麦千夫膳牛羊几处村联翩来汗马奋激起溟鵑家法常如此官资讵足论一经遗教在百忍古风存棣萼荣春服荆花覆酒尊羽仪鸿有序兵卫虎连屯盛事垂编简声华彻禁闈恩波通弱水和气接昆仑薄俗嗟沦靡陈诗示后昆

彭城守春旱祷雨

恒阳征僭忒云汉闵时劳大野黄尘动中街白日高穷黎忧惻惻良牧思忉忉礼秩祠羣望官联领众曹雩坛登祝史俎实载牲牢肸鬻通幽閤精诚絕慢慆王春方介祉神化岂屯膏灵雨随车骑阴风卷旆旄麦禾朝娓娓松桧夜骚骚甘泽经三日浑流失九皋涓涓通陇亩袞袞向波涛陋巷荒黽衡门拥艾蒿杂花红似锦细草绿于袍已识天无妄寧论地不毛秋成看栗栗民食免嗸嗸帝德回衷眷輿情解郁陶巫歌迎赛肉社鼓送

香醪岂弟皇恩畅循良盛世遭书年应纪异作颂更兴褒亦有垂纶客临流为洒毫

送翟御史金山北宪

北京开臬府持节肃羣工宠甚郎官幙威仍御史驄承恩方蹢蹢辞阙去匆匆紫气榆关外朱轡瀚海东霜寒翻鸷鸟云影送冥鸿观省穷辽水从容问国风宸衷推惻隐庙议动昭融已觉皇威布常令主泽通邊烽无野战物色屡年丰善政应除弊贞心独秉忠祀朝依碣石宾日候王宫处处讴歌起家家乐事同勲名宜立致簪绂会登崇更草匡时疏殷懃达帝聪

六月二十日奉迎皇太子寶章龚左司赋诗遂次其韵

万世尊皇极重光启帝猷草仪周典礼特笔鲁春秋鹤驾高门出龙章别殿收承祧称主器监国赞成谋旭景前星焕春宫御气浮輦前新簇仗花外不闻驺甲观三千里霓旌五色旂珊珊苍玉佩穆穆翠云裘定命迎仙荚祜符锡范畴龙媒初效力鴈序总停辀宿雨犹涵润凉风飒似秋九重思继述四海念懷柔自昔经纶密应知德业优朝宗修贡篚画一接康侯輝赫张天步从容仰冕旒穆生存醴久疏傳锡金稠问学虚前席登瀛列旧游国惟隆本干时已播恩休亦有樗材散寧无匠石求濡毫虽擬颂健笔愧难侔

上命师相辅导青宫又次前韵

黄阁资贤辅青宫赞圣猷潜龙渊肃肃仪鳳羽秋秋秘殿黄金额仙居白玉楼台阶基化运后德顺嘉谋昭代功无敌高名世不浮衣冠陪后骑貔虎拥前驺庶事犹悬鉴羣公若綴旒醉传鸚鵡醺寒赐鸛鷖裘宿漕风连海新田雨满畴捷书时挿羽使者日乘轺阅阅经纶地明良际会秋圣情归锡賚天语出温柔固识王章在深惟相业优河山留誓券茅土冠君侯越骑瞻戎服徐邦识庙旒法从三尺谨恩及万方稠薄艺尝簪笔微班得从游未能酬夙志何以报鸿休鍾鼎非吾愿山林亦易求寸衷徒耿耿期与古人侔

辛巳秋初归田有期喜而成咏因感今懷昔赋成一百五十韵

河山神禹绩幽冀帝尧都畿甸三千里【今畿古幽冀并三州】干城百万夫天戈随所指地轴待人扶迹启龙廷遠兵临虎塞孤【国初取燕雪夜入虎北口】羣雄归霸主四杰翊基图炎绪宾旻谷寒金抚鍛炉中原方板荡庶类划昭苏九壤邦家赋三农黍稷租户封登岁版物贡应时需漕转河仓腐烟输甸灶舖经纶开世室混合尽寰区弼亮求耕钓英贤起贩屠有桥题墨柱载道弃关繻济济皇多士雍雍国硕儒师行汤誓训谟协舜都俞一德遵神武多方圉化枢星辰天北极文物地东隅孺子谁堪托交邻信已渝祸机生肘腋剥丧切肌肤内溃离荆楚先声震越吴筑台方拜将破竹已长驱谈笑收图籍轮囷发藏帑义夫思感激烈士涕沾濡旌旆沧溟棹衣冠岛屿郭哭秦无复报蹈海竟何辜曾记忠臣传空存内秘厨始因三统正已作万邦孚重译而来献修程不惮劬建邦强本干分社列茅茷綬冕朝仪集梯航贡篚输殿开金幕席地隱锦氍毹率土尊元会灵杓直孟陬垂旒容穆穆鸣玉色愉愉瑞拟龟陈范祥开象载瑜鳳旗飞黻绘虎帐挿彤旌昼接初张宴春城大赐酺舞行分羽翮乐奏引笙竽御酒擎鸚鵡宫腰蹋鸛鵒绣帘香喷

雾红袖脸凝酥宠锡公无波皇心爱不姑从容周典礼宏远汉规模勲业诚高矣文章亦
焕乎堪輿全所畀开辟古来无奕世归前烈丕承仰圣谟设科仍较艺献颂竞操觚第列
金张密恩从卫霍殊锡符盟券赤纳陛戟门朱优戯时闻鼓珍庖日荐腴花娇金屋贮
熟翠眉须擅制由先彻承谋又故吾豪胥真首祸接迹合羣谀豺遘多囓嚼蝇营善啜
程书违尺度黠货较锱铢鼎餗顷筐载宫墙粪土朽纷纷联组绶琐琐进葭蓂编户渝名
籍枢兵甯隶奴赋输年削弱魑魅暗揶揄廊庙轻千虑锄耰起一呼蚁穿终溃决盍食莫
支吾伏莽狺狺犬鸣祠处处狐邑荒烟寂歷野战血模糊国步何颠蹶奸谋敢覬觐风尘
朝漠漠笳管夜呜呜烽燧飞燕薊冰澌带易溇楼前朱汗马城上白头乌奚啻生疵疢
能洗毒痛赐书从慰藉哀诏漫于戯怅望鸿飞阔追扳骥足弩射天悲溅血浮海勇乘桴
迷复行多眚颠頤口卒瘞人才今鹵莽世道日榛芜忆昔丘园賁懷贤岁月徂紫微华盖
坐黄道泰阶符乔岳宗衡岱深源达泗洙作人宜棫朴为政敏蒲卢国已称多造时方见
大巫共稽夔乐律独咏鲁风雩石室紬书盛宾筵讲席敷百年悲宰木一束奠生刍子敬
家毡在元成世业俱六经悬日月百刻谨朝晡力学为师古专门亦授徒许身期稷禹忧
世慕唐虞自忝龙门客人称鳳穴雏让推吴季札忠拟斗于菟官政年方盛成均矩不踰
于焉思继绍不敢离须臾粉署青丝直华堂瑞锦铺清时叨著作极力事描摹述德安能
伋知非窃比蓬苍茫懷野服容易接亨衢清庙资梁栋微材愧樽俎立螭簪白笔冠豸伏
青蒲折檻心常壮牵裾气不籠家声幸未坠朝论转相揄鱼橐垂腰重驼章结绶纓乘輿
时警蹕琐闥晓追趋赐食分羔雉连茵杂豹羆上林巢鸞鷟太液散鸥鳬春色红云岛寒
光白玉壶暑清长夏簟露浥冷秋菰宫树惟栽柳仙家亦种榆步陪宗伯履筵列侍中襦
服礼期无玷论兵实自迂承恩辞殿陛列骑出闔阍上日羣公餞皇华六轡諏宣威扬绣
节伐叛赐金鉞霜气横埤垧湖光应属镂由来懷德地今日不臣诛否泰机潜伏乾坤乱
已怵侯王神所賚僭窃尔何愚优诏从寬大伤心献馘俘辕门存简翰斥候遣戈殳小腆
原原附渠魁寸寸刳临危亲决战鼓勇誓捐軀分阨多违命争权始构诬漫遭摇毒蚤岂
望报恩珠谁谓青蝇集能令白璧污山昏鸢啄屋江暗鴈衔芦暂铄扶摇翮真成局促驹
藩臣隳戎备野老独惊吁蔽日来幡帜长风送舳舻闭关方吝赏破的已摧枯举目郊原
甯传声将相逋与谁矜阅阅无复顾妻孥殷勤怜崩角豳歌美跋胡居然鱼漏网拙甚雉
罹罟戴笠山头杜持旄海上苏凄凄冰肺腑飒飒雪头颅夔蜀诗千首嵩阳饭一盂满盘
朝苜蓿几见岁屠苏义路成孤往名缰讵可拘民情眉可察羈思口空餬枕石身长病餐
霞体任臞秋原伤蔓草夙志弃桑弧未筑扬雄宅犹乘范蠡湖感时思顾遇望遠意踟蹰
故里荒松菊良田秀萁茶輿台夸负乘衿佩困泥涂林黑烟藏豹山空雨笑鰕仰天瞻大
介无地哭穷途茅屋寻常梦梅花八九株败垣牵薜荔流水挿秔稌野蔌从人饌村醪不
用沽春风徐步屨秋影鉴髭须麋鹿忘猜隙渔樵结友于独招华表鹤亲钓锦江鲈溪月
明如昨山花色似姝经丘通窈窕寻壑歷崎嶇真似陶彭泽归来足自娛

归舟江涨【壬寅三月】

乾坤谁草昧城郭自戎衣白髮頻年病滄江此日歸長途經戰鬪久雨滯芳菲云水
浮天起風帆逆浪飛尋盟鷗泛泛尺素鴈依依汨沒聲名在艱危故舊稀及春營野事
諏吉到荆扉紅杏家家酒青山處處薇節旄寒更落遯迹氣常肥不洒前忱淚惟全杜德
機
次韻歸途示友

仙舟楊柳渚游子芰荷衣劍引龍光動檣隨燕語歸鶯花春冉冉烟草暮菲菲北極
樞常運南風檄屢飛曹瞞空有挾劉表竟誰依高卧風流遠諸生候問稀久無滄海夢自
掩白雲扉遺事曾編竹幽情獨采薇乘時生蠹孽遂欲饒膏肥泉石無乖愿風塵早息機
吳原廟龍津亭

豫章城西四十里吳原山有風雨二池其深莫測四時不竭蓋有龍居之邦人作廟
祀焉張九齡開元中為邦督以旱禱祠輒應作詩紀其事貞元中兵部侍郎權德輿為撰
祠記皆見郡志國初祠廢郡人京楫傅從畊復祠祠前作亭四楹名曰龍津今祠毀而亭
存傅之孫以誠為黃冠師比遊西山見亭扁乃大父所書考其歲月八十五年矣予賦詩
識其感慨云

龍德為天用神功發地靈風行千里雨氣合兩池星盼蠶通幽閤昭融接混冥朝廷
崇祀典郡國載圖經闔辟乾坤大高深海岳寧祈禳端有自黍稷肅惟馨古廟丹青畫威
顏土木形紅塵生瀕洞碧瓦見飄零野甸寒茆白高原老樹青江山余勝概党術有津亭
望遠雲三島凭虛屋四楹衣冠存古制翰墨表儀形珠浦光仍復綃人織未停遠孫來拜
俯遺事系瞻聽志已期增飾誰能與勒銘南陽吾獨卧西嶺亦高局不作南岩夢難招楚
澤醒題詩寄寥廓感慨在郊垧

再和康武一百五十韻

茲承雅制鋪張匡山之景憐予飄泊而見招深見高誼然吾家華蓋臨川二山間二
山江南之名山也至元中先子常辟地臨川山陰布水谷著書凡五載然後歸後之人以
其地為觀距吾隱居四十里每憚其峻絕僅即其麓而止而華蓋之近則數造焉自為吏
不獲造亦二十余年矣今聞匡山之勝雖它景故樂也況予舊隱而先子之舊遊者耶因
韻成章用述吾思且識吾愧謹寄呈左右以答厚意以成后約云

臨川真隱處華蓋古仙都拔地几千仞當關惟一夫堪輿方鎮立开辟鬼神扶秀色
金蓮并姓天玉笋孤龜峙標分野鰲極奠輿圖蛻迹仍留洞遺丹尚在爐壽星南斗迴氛
瘴北風蘇洞草俱靈藥畬田亦國租土宜兼沮洳物貢備供需石乳晨堪采霞漿夕待舖
昔時存廟殿大谷有廛區福祉民依德齊民市絕屠多方真合統九達不傳繡世業因成
俗山居半是儒代祠天使下賜号帝音俞六宗分坛兆三辰運道樞休嘉垂胤祚純嘏浹
邊隅大化能無被羣情孰敢渝空花光奪眼寒粟凍生肤建礼師从蜀逃名卒在吳詩傳
山鬼咏酒巵澤龍驅玄璧加神币香奩發御帑菲菲空翠扑灑灑露華濡架壑虚撐屋悬
崖俨甃郭四方牲制謳百物礼称辜圆辉升朝气天灯映夜厨便蕃真贐集容易惠心孚
襁褓邦家谨跻攀守牧劬登歌丝间竹缩酌馆承菹象物委蛇致精诚恳款输周旋瞻盼

蠻拜俯藉氍毹震电惊岩隙瞰阳眺海陬洋洋羣望秩穆穆万灵愉云干铜池秀瑶花雪
色瑜高居朝絳节大纛拥弓旅雅颂农迎腊春秋党醕醑萍甘分楚实松响效齐竽阴谷
藏■〈彳 员〉 蜚阳坡叫鸛鹄遠嵐浓似黛小雨润如酥羽札传青鸟鸾书降紫姑卑高
归育发陶冶出钧模神化茫茫尔文章郁郁乎坤维终古在国事近来无不有氓为崇乌
知庙失谟妖尘徒瀕洞秋色自棱觚和顺英华畅生成品彙殊叶重光点漆果熟艷施朱
春尽薇尤脆秋来蕨更腴衣冠惊傲扰物色静相须專壑深连干趋朝一遠吾官聯陪俊
杰史笔削奸諛陈谊惟忠蹇摛词岂噉嚙太阿初失柄关石竟迷铍所限千寻抹空怜一
簣圻烽烟歷江海玉树倚葭葦旧业余兵燹新诗示獠奴昭融生掩抑罔两肆揶揄逸志
终难降高飞不易呼含情问桑梓忍泪盼楸梧废邑号豺虎荒墟穴鼠狐归心寒怵栗望
眼老模糊眊眊争沦没蚩蚩窃觊觎战场犹斗格暴气独喑鸣盆子空懷沛王郎不渡濠
久传河上骑应逐幕中乌潦倒怜身病艰危念主痛风云增契阔綸綍息于戲已觉归迟
暮何由策蹇駑尘侵蓬岛树浪蹴海津桴问俗情懷恶营巢手足劬閭閻忘揖让松菊尽
荒芜帝业元无外先朝事已徂万邦归显烈一德闕阴符道统承周旦儒声谒鲁洙词华
高汉魏翰墨劣王卢大雅兼商颂悲歌出楚巫祝传多福告祠报有年零允廸重华协祗
承四海敷大宾朝玉帛厚往及薪葛间出生人杰由来盛际俱降神资屏翰立德继申甫
不识真王佐犹知大圣徒经存遗礼乐书正古唐虞户屢来朋乐家毡付众维宅中思卜
洛丘首欲营菟耄齿能无倦从心自不踰业弘天广大熙緝道须臾帝制频繁掌皇文特
达铺应期俱述作好古岂临摹命世人推孟时言使托遽悠悠懷道迹坦坦履高衢清庙
朱弦瑟明堂藻绘栌穷年遗寝榻终日坐团蒲大匠宜规矩羣材合细麓縉绅薪荐达悬
鉴发褒揄楚楚长裾曳锵锵弱组紆经筵重席讲家礼过庭趋旭序班鹄鹭星垣列虎貔
共瞻仪世鳳暂出上方鳧芍药分珍饌伊蒲送玉厨好贤旋授粢调鼎或宜菰车马阴阴
柳星辰歷歷榆成均馨羽钥公子锦衣襦鼓铎明彝教章逢化腐迂一朝违观阙孤棹别
城闕几见宣麻召頻来驷马讞遊山时着屐刊径晓持鉢衰障扬旌旆平冈按属镂亭台
迎客赏榛■〈廿 戚〉 命童誅气合天无际秋明势更虚孤高来爽豁阻塞肖昏愚培埴
还依麓牵连若献嵎周回青屏翳罗立碧戈殳几度凌巘嶮谁能与划剗敝庐千载契高
卧百年軀候气常闻异嘉祲詎可诬白虹开楚璞明月并隋珠早已高时望鄉无旧染污
出门平陟巘临水密编芦差穀雝雝鴈场苗皎皎驹遗荣恒淡薄勇退众惊吁采服从韶
亂青帆共舳舻鹤归华表遠龙去石池枯今似秦人贅长怜楚客逋无家懷里巷有恨哭
妻孥抔土阨山怪归魂依舶胡区区近骨月稍稍脱置罟遺恨贤王李甘心属国苏扶藜
劳胫脰览镜愧头颅春麦黄云杵秋杭白雪盂比鄉仍枳棘何处又屠苏夙契留深眷羈
懷耿自拘草冠心寡累藜糝口堪餬胜地蒙招隱高情欲养臞衰年常伏枕新月屢张弧
名阜同千里扁舟异五湖望云情繾綣触暑足踣躅霜脆深泥芋飴甘沃壤茶诚能结茅
屋不复梦轩涂水国寒生磷烟村夜聽鰕两山元共姓一致岂殊途桃是玄都种桤宜锦
里株瓜红秋熟速瓮白岁收徐久已安时弃何须待贾沽御冬存短褐传信賴长须快覷

期追琢嘉言别易于寻盟言鸥鹭余事托莼鲈发兴成酬唱忘形效丑姝天逵瞻窅窅贤路慨嶀岨但遂烟霞志青山任所娱

康宗武和廉介

昨承惠教长律雍容尔雅虽衰世之志而有治世之音三复歌叹第以韵拘难和谨效唐人用韵而不能次拙亦甚矣端录奉呈伏乞垂教幸甚

鳌极分羣类鸿灵奠八区人文疏地秘吾道幹天枢羲画龙图衍苍书鸟迹纤力田初识末伐叛肇弯弧穆穆隆皇治雍雍阐帝符比封侯稷契执艺总斯爰熙洽均黎庶光华薄海隅百王宗令德一视效宏樛河洛滔滔水邦畿坦坦途征苗开誓命载亳谿来苏垂统将千禩偕行慨独夫鸣岐争覩鳳流屋喜瞻乌文德重华并声名二代踰毫荒寻遇满板荡适遭胡地启亳王裔天开素主徒象尼神已降铭鼎口先餽礼乐昭云汉春秋凛钺鉞迟回思狗铎浩荡欲浮桴窃窃诗书囿巍巍道德陬奠楹双涕泪锡誅一于戲鲁道沦衰薄秦坑肆毒痛叔孙仪卤莽伏氏语含糊六艺多狼籍羣言竟嗷嗷隋儒轻擬议晋帖巧临摹湘水迷荃芷梧台杂瑾瑜书林秋淅沥义圃晚荒芜京洛乾坤辟周程剑佩俱道存康节邵学衍紫阳朱地望崇邹鲁渊源接泗洙耕莘伊尹聘出昼孟軻迂寂寞遗经笥凄凉大冶炉辉辉山蘊玉蔼蔼泽藏珠一统真元会羣生德泽濡梯航千里贡玉帛万邦趋绣绘衣裳被章程典册敷席重丹宸座土列白茅菹盛德跻平世频年赐大酺倦扶筇竹杖寒拥罽宾氍

岁晏

空江岁年晏暮色水霜剧鸿飞何冥冥几月度砂碛孤臣欲洒血万里书一尺君王穀珣弓幸向上林射

学言稿卷二

●钦定四库全书

学言稿卷三

（元）吴当 撰

○七言古诗

明皇教笛歌

绿杨烟裊春昼长沉香亭北万花香君王制得清平曲教与花前吹鳳凰玉靨生霞春梦起闲愁不上蛾眉里欲使娇声发絳唇为调新谱传纖指絕世曾闻玉树歌调成新曲更情多人间吹作无穷怨白日深宫奈乐何曲中更奏霓裳舞谁信渔阳有鼙鼓骊山宫树起秋风肠断香消马嵬土

赠太虚子长歌

昔遇太虚子飘飘在滦京东风吹雪添河水宫树五月无流莺君随挂席穷彭蠡予亦函香窥海水谁料宫袍又缚身却骑黄鹤上星辰我我瀛洲客尽是谪仙人从此相逢金阙下诗酒清狂转潇洒扬雄闭户草玄经白髮秋来漫盈把矫首望太清妙运无时停

宵尔元化枢歷歷日与星游尘杂氛起寻丈容光扰扰纷成象所以太古仙倒景霄汉上
知君深居勘大还呼吸沆瀣怡芳颜朝衣早挂松萝间坐邀王子晋吹笙紫云间令人可
望不可攀

達彦修秘监号云松隱者又自作图邀予赋之

香垆云气半空赤千尺长松倚青碧谪仙去矣秀色留谁与孤云共栖息蓬莱高人
业嗜古身在道山天咫尺为君先约彭泽翁五老峰前候飞舄

题燕人雪溪图

朔风惊沙大地裂水腹冻坚飞积雪谁识山阴放棹时疎竹寒梅映清冽鉴湖一曲
綠生衣萧萧白髮苦思归怜君岁晏如相访江上渔蓑在钓矶

送吴景尹游嵩岱兼寄尚元素刘道源

尹也我同姓论交每忘年闭户读诗书所最在古先男儿生时蓬矢六壮岁何为守
穷谷昨者张帆向顺风千里长淮春水綠我闻君行不忍别杨柳新条未堪折君今别我
归何时思君惟对芙蓉月芙蓉山月四时圆擘崖飞瀑写哀弦君登嵩岱望海日我正独
坐对月聽潺湲太室山人尚处士昔年宦学来南楚刘郎好古也自贤为访于今读书所
緣云更有最高峰云间倘遇采芝翁殷勤幸道余心忡江南春风花正红有酒满醅浇君
胸酒醅有尽别意无无穷

美赵侯祈祷

徐关古郡雄东国河上孤城高岌岌长波激浪两流合遠黛凝烟众峰立当时豪杰
虽已矣功利至今存霸习自从圣代百年来稍有弦歌事沿袭赵侯作牧驾朝骖紫绶银
章光熠熠尘上彤管书牒稀春满青郊民俗辑今年恒阴若为沴满耳秋声风雨急惊雷
怒电白日飞拥树连村黑云湿旷野悲号麋鹿羣寒潭翻动蛟龙蛰波涛滚滚迷冈阜禾
黍离离失原隰天高地厚叫不闻老农祇抱锄犁泣我侯输诚吁彼苍奠币陈牲劳汲汲
干端坤倪豁呈露雾散烟收倏呼吸丽日昭回昼景舒祥飙荡拂淫威翕于今报祀礼无
违长愿丰穰民乃粒万井桑麻接境多四方冠盖如云集侯家自是国桢干在昔声华蔼
都邑矢诗为载尔农謡卷阿更续生民什

诗莊

雅大中采四方名士诗数万篇名其居曰诗莊

诗人自昔身多穷云是身穷诗乃工太白飘零一杯酒杜陵茅屋随秋风君莊采菽
不盈掬仅有新诗千万幅饥来一字不堪煮犹是逢人索珠玉年少执戟称卫郎软裘快
马双明珰驱驰玉事出奉诏西拂弱水东扶桑龙光南去冲牛斗含香曾到扶胥口云邊
晓挂洞庭颿花时夜醉长沙酒人间曾见墨淋漓当时采笔生光辉千金散尽不自惜囊
中惟喜有新诗嗟予岂是能吟者秋月春花浑漫写故园菊松已荒芜两鬓萧萧雪盈把
君不见相如作赋家四壁子云草玄宅一区君莊风月固有余不知身世贫何如

段应奉湖山旧隱

临平湖邊秋閣小古木幽篁通官窈云間返照落漁帆江上余霞送飛鳥蒹葭蒼蒼月滿硯何日西風一棹歸詩成沽酒切鮐脰坐見山水涵清輝

南徐守李士寧勸農之日朝廷遣使召為大興府尹郡人為圖其事求予賦詩以記

晴川遲日明花柳酒帘樂器村村有承平官府勸農來竹馬齊迎賢太守自從太守到南徐春衣有帛食有魚男耕女織不用勸連岡斷塋皆新畬今年又見祠田祖牢醴香肥雜歌舞烏犍受策自扶犁東風霎霎吹靈雨柔桑枝上啜黃鸝樹下父老相支携官曹抱瓮貯濃酒移饌芳亭隨所宜老農得飲增歡喜起聽訓言書滿紙朝廷無以我公歸坐使風移民俗媿我公歸去民何從作圖賴與奏天聰常遣太守如我公我民至老歌年丰
潘子華画上京花鳥

溧陽三月雪正飛隴樹四月青紅稀白翎啄沙黃草薄阿藍短翅寒相依南熏吹水振羣蟄滿川花草濃云濕穹廬露冷牛馬肥蒺藜沙上西風急潘侯妙筆留神都金蓮紫菊誰家無江南鶯花春冉冉誰寫當年蛺蝶圖

栖鵲圖

江空月冷霜如水雙鵲梢頭飛不起錢侯寫生苦逼真淡墨蕭疎妙難似君不見上林高樹拂雲齊托巢生子總相宜願爾朝朝來報喜春風長在萬年枝

野航亭為陳晉賦

山人筑居青澗傍數間矮屋如舟航清風粼粼白石爛滿目野水凝秋光浴水鳬鷺閑來去憑欄總是滄洲趣竹間涼月白紛紛更似蘆花最深处高情閱世猶虛舟久矣委心從去留秋風不待歸張翰夜雪每疑來子猷兒童忽報前川漲雲霧軒窓九天上故園夢斷酒初醒落日遙聞采蓮唱西安城邊芳草多亂汀橫渚盡烟波芣蘭為佩寄遠道又恐閑門無客過迢遞江南望江北住久豈知身是客多情我自愛桐鄉自信鷗盟寒不得亦有扁舟彭蠡賓別却槎頭今几春明朝便合投簪笏向子亭邊與卜鄰

徐州贈同邸客

臨川山人來作客萬里携書上京國朔風吹起黃河水河上行舟帶寒色窮冬雪花三尺深客窓抱膝惟長吟夜聞解鞍有同邸晨即市酒開囊金舉杯殷勤相為語家在單州閭巷里庭闈有親七十余合家穉耄數百指上堂稱壽春熙熙下堂服勞日濟濟門戶有子膺晨昏盤飧任婦承甘旨東風吹綠牛羊肥良田自足供鋤犁夾溪桃李炫晴晷映階萱草迎春輝共知吾邦是樂土男勤耕桑女織組貿遷有貨居廛市歲时无事煩官府家人老大不出門長兒近日遊荆楚阿嬈愛孫如至瑤盡室悲驚為愁苦予情觸此更皇皇遠出求之來侍旁賢愚不足挂懷抱夙夕忍此慈心傷我聞斯言亦感激秉彝至德各有常爾能慈孝出天性篤行自足為義方責善恐違賢聖訓至誠可貫金石剛琴瑟在御良燕喜塤箎迭奏成鴈行庭前彩服列三世人生至乐乐未央酒酣為子歌慷慨持贈可比黃金瑯嗟予霜露興慘怆蓼莪三復劬勞章

湖西羅受可作梅月圖贈予北行賦此報之

青山湖上去白云湖上住草屋八九间梅花两三树年年许客看花开花下携琴载酒来对花把酒唤鹤舞酒酣落月尚衔杯黄昏疎影横斜好更取生绢拈笔扫高情能画胜能吟风雪荒寒忆郊岛我来不值花开时骑马独从湖外归上阳密露春如海祇有东家蝴蝶飞

九江丁祀闻鼓吹感懷

上丁修祀又春分鼓吹声传旅夜魂世路荆榛迷圣域沱江烟草怨王孙空怜宇内干戈满无复河间礼乐存上国风云清庙閤中天日月素王尊春秋摄献元臣重爵秩追崇祝号敦束帛承筐先俎豆牢牲升鼎从羔豚公侯显相千金币牺象宗彝九酝樽玉磬编钟歌大吕朱弦疏越奏云门诸生襟佩趋鹓序百辟冠裳谨骏奔翠积宫庭寒肃肃光生花树晓焯焯秦坑灰烬遗经坠王业陵迟古道昏霄翮倚风留退鷁辙鳞随水化冥鵩八音夔律何由正六典周官诂易论自叹白头思绍述漫垂青简照乾坤

学言稿卷三

●钦定四库全书

学言稿卷四

（元）吴当 撰

○五言律诗

江上晚景图

遠景峰峦色高松铁石柯晚晴初放棹春水已生波尽画沧洲趣难传欸乃歌山居无户牖端为白云多

紫霞庵

结茅江水上霞气护幽居已似赤城迴常疑丹井虚仙桃承雨种秋叶带霜书应得长生秘晨餐愿乞余

赠梁道者

江东梁道者自少学神仙袖有烧丹术囊无买酒钱看云眠白日对月礼青天为问蓬莱水何时似昔年

山居图

茅屋在林阴桃花夹径深遠山浑似黛遊客总能吟杳杳穿云杖萧萧坐石琴展图懷旧隱便欲解朝簪

六月舟次房村

红日荒荒落黄河滚滚流客行当盛夏水宿似清秋市遠人烟少村平树色稠遥山青数点明日过徐州

极高明亭

憑虚连白水望遠俯青山结屋烟尘表吟诗松竹间落花綠客扫飞鸟共云还肯着蒲团坐从君尽日闲

仙遊觀紫雲亭

山色更深处燒丹仍筑亭春雲瞻紫氣夜月卷黃庭種竹堪扶老栽松已伏苓何時
解塵鞅來寫換鵝經

九日紫極宮對酒

野水通江闊山雲挾雨涼燕辭宮署遠鴈過海天长紗帽花堪插仙瓢酒更香蒼茫
懷國夢烽火尚炎荒

酒罷分韻得桑字

江海舟初動山林興詎忘已荒陶令菊未種武侯桑對酒雲千里懷家鴈几行今朝
小兒女个个紫萸囊

九日夜酌分得枝字

對酒杯頻舉看雲席几移軒楹秋窅窅燈火夜迟迟醉脫烏紗帽香傳白露枝忽思
三徑里花蕊正離披

次韻答蕭性淵巡檢

官舍連修竹春旗映遠山宦情江海外劍氣斗牛間田野無巡邏漁樵有往還萬方
逢盛治弓馬更清閑

和劉季平

昔聞灘上水遠自粵南山乔木三春里清音五桂間片雲留客住細雨棹舟還為恐
離家久芳庭草色閑

和蕭獨清

昔別是何日長聞隱道山題詩傳海內賣藥出人間林鶴隨雲出潭蛟帶雨還偶來
高坐處帘外落花閑

清明日同學士李惟中趙子期及國學官携酒東岳宮後園看杏花

柳色滿河堤春沙不作泥家家踏青去處處聽鶯啼翠幄凌風迴香車簇道齊揚雄
甘寂寞載酒問幽栖

祠廟出東城風雲拱百靈神光通御闕天影抱彤庭隙地多幽事芳辰聚德星道人
偏愛客更許制茅亭

宮館憑孤曠幽林眼底生葯畦晨露重茶灶午風輕酒許麻姑送羹從海客烹鄉心
勞想象便欲棹舟行

新火營寒食他鄉展物華暖雲將燕子春色上桃花自進賢人酒何勞妓女車平居
耽野趣未覺道林賒

圃因春雨種竹自昔年移雲影常依石春泉已滿池望中情未極花外立多時每動
田園興東風長鬢絲

上林華蓋逼宮署紫垣開疏闊經時序淹留惜酒杯仙人栽杏去學士看花來几日
應開遍題詩許重陪

仙人遊图

莺啼通窅窕马迹歷孱颜载酒溪桥外哦诗松树间桃花深映竹云影浅依山无限
临流兴扶藜欲叩关

送人归蜀

愁寂都门别艰危蜀道行四山皆雨气尝日有鹃声北极红云阙西江白帝城懷亲
兼恋禄去住总关情

送人下第南归

落卷人争读扁舟客自归苑花秋冉冉江雨梦霏霏壮志经留筇伤心线在衣看君
负文彩他日倍光辉

童氏作楼奉亲名曰乐心

高构日登临庭闱总称心遊鱼出水底鸣鹤在林阴山雨晴留黛松风夜当琴地幽
多胜事不惜酒频斟

史指挥作堂学傍名泮邻

旌柴将军第今睽孔子堂泮泉通射圃庭草映宫墙义训三迁旧家声五桂香城南
天咫尺驻屐许相将

送蜀士赴潮阳巡检

江深巴子国海阔粤王城万里独为客三年尝领兵艰危才易见留滞气难平莫洒
临岐泪图南羽翮成

王孝子刲股

孝子有异行世情生叹嗟炉香通夜白股血启晨赧儿体应无恙亲年幸有涯殷勤
鄂人对直道正奇衮

赠沛县阴阳教官

七政阴阳纪三辰卜祝科中原井邑小圣世教官多譙鼓夜传漏野田春涌波儒冠
自拘束莫聽大风歌

节妇挽诗

抱节青春苦茱阳有故家教儿能綰绶报德已宣麻台倚巴清墓风传鲁妇壑夕阳
原上树依旧宿慈鸦

题唐子华画

老树吴江上茅茨八九椽晚山浓似黛秋水净无烟盘石堪垂钓孤舟许醉眠卜居
宜近此何日赋归田

送毛李祥归云林因托之访予山居

客子年方盛家山花正浓扁舟遡鸿鴈高浪蹴鱼龙京国五千里云林六七峰升堂
举春酒始得豁心胸

莽莽闻征鼓纷纷踏去船衰颜尚簪绂雅志自林泉茅屋应无恙山田幸有年憑君

上华盖为访白云边

送李卓归临川

江上兵虽满山东路已通髮从今日白花似去年红浮世嗟蓬转幽栖想桂丛因君
万里意极目送飞鸿

徐氏同德堂

千载南州士流风气谊存合居今五世同德又诸昆白日书连屋清秋稻满村圣朝
敦孝礼桓表已旌门

送杨曼卿

京国莺花里扁舟望旧山烟芜连楚泽春水隔乡关访古题诗遍匡时草疏闲丈夫
无别泪此日满愁颜

福泉亭

筑室庐江上山泉亦有名深源流福泽长日作春声润借桑麻秀寒分井谷清尘缨
如可濯来看白云生

挽待制杨贤可

才逮古循吏名成初制科百年存气节五郡起讴歌致政冰衙重题诗秀句多风流
今已矣洒涕望江沱

宵旰忧民牧人才转寂寥如公多令望絶迹上清朝玉署真成梦金鱼漫在腰庆源
宜有待嗣子各风标

送倪长卿

江汉风尘里关河日月傍乍疑音问阔顿觉羽书忙献赋垂归橐销魂逐去檣朝缨
漫羈束何计濯沧浪

送宣使蒋盘归寄江西省郎中颜希古

故国雄藩在清秋使者归江湖陟险地舟楫蹈危机士壮常思闾城高屡受围亦尝
修谏草直欲把天衣

行李随秋色萧萧出帝城两行忧国泪万里望乡情赋敛无修贡疮痍未息兵大廷
俱鼎食何以报升平

方镇诸军缺城池累月攻战场宵磷碧贼垒晓旗红幕府谋猷密羣公胆气雄妖氛
须净扫崖石始铭功

吾庐华盖下乔木白云边每忆秋风鲙常懷雪夜船传烽今四野飞檄已三年亦有
平安问烦君万里传

送徐仁辽阳教官

辽水东临海榆关北际燕官程千里外行色五云边童冠来春服歌钟杂夏弦莫嗟
无籍在归路近星躔

送人补闽宪译

能事通重译宫资早致身江关流誉在宪府荐书频鵬鸢思云路莺花怨暮春瓯闽
邊檄淨冉冉离风尘

送王都事度海入京

万里皇华使千夫瀚海船长风披朔雾高浪蹴吴天江汉新烽燧车书旧幅员不胜
遗老泪咸望太平年

便宜曾奉诏受节大明宫列郡旌旗合三关道路通誓师亲督战破贼不论功率土
王臣在何人高谊同

许国心犹壮驰书路更长物情移白黑士气转苍黄郡邑风烟里衣冠日月傍共谁
清海岳持以报君王

当宁资贤辅持危巩圣图万邦通禹贡九德协皋谟师出宜无敌城降戒不屠老臣
空有策何计彻神都

望柴桑

何处柴桑里当年处士家五株门外柳九日径邊花已草归田赋难乘下泽车故山
尘漠漠极目送昏鸦

咏懷旧隱十五首

旧宅今何在云山昔更清樵歌秋树谷渔网夕阳汀门巷来车盖书声接户庭遗墟
悲蔓草浪迹信浮萍

江雾仍为雨山花故作容秋风余鼠雀寒水落鱼龙慷慨心犹壮羈栖力已慵白云
华盖表怅望最高峯

忆昔升堂日诸生授简时遗经周礼乐野服汉威仪一自趋丹鳳微班侍玉螭风尘
惊岁阔猿鹤怨归迟

高堂存古制粹德俨先容道脉千年统人心百世宗夜台悲化鹤云气想犹龙松柏
宁无恙青山一万重

西斋风月好庭草到阶前春服趋童冠秋声杂诵弦题诗黄叶上拄竹白云邊俛仰
成今古销魂为黯然

乔木依深谷居人尚几家衣冠迷宿草舟楫失桃花转鬪宁无已劳生已有涯毋烦
问松菊何计事桑麻

契阔风云会栖迟道路长老来犹作客春至好还鄉酒醒天连屋诗成草满塘家声
尚清白世态任炎凉

党里乌巾集邻翁古意淳瓶罍随野俗耕稼及清晨世业诸孙在寒山白屋贫为传
宗谱旧长使旅情亲

幽居临水竹老桂出林阿荫接青云武花开碧玉柯百年秋露重十里夜香多荣悴
知何意炎尘起海波

故园谁识主曝背已忘君雾雨鸡豚社寒山鹿豕羣池分涧底水圃斷垄头云茅屋

知堪赋长歌对夕曛

昔人营寺日野老在朝时栋宇山林净松杉土壤宜海尘留法雨檀施寄禅枝接地
多先垄春秋拟合祠

茅屋云犹在桃源世已非渔樵能有待鸿燕尚知归霜露春秋感风尘造化机松楸
千里日夜夜梦魂飞

世事嗟何及天伦恨已深乾坤一抔土霜露百年心去住青山隔艰危白髮侵丈夫
无别泪此际倍沾襟

山黑天仍雪江寒梅未花昔年宾国日几醉上林霞勇退寻归棹甘心理钓槎如何
青布袜未得踏溪沙

白社千头橘成都八百桑每思亲棣萼不为问山莊太史瞻鳧影家人识鴈行茅茨
容易葺春水棹相将

匡庐

匡庐望不极几度涉风涛秀色一道出振衣千仞高仙岩谁种玉鬼谷旧栽桃白鹤
巢云表秋宵见羽毛

双剑峰

双劒倚秋汉孤城瞻碧岑岳连吴楚阔光合斗牛深胜地千岩壑长江一带襟州图
增杀气愁眼倦登临

述感十五首

圣祖开寰宇英贤集网罗暂烦周斧钺即听舜讴歌世阅风云阔耕岩雨露颇万方
俱职贡一旦尽烟波

輿图归覆载天畀万方全帝德元无外皇纲自失权中原堕土赋内郡落民编国计
东南隘经邦愧昔贤

太祖收中夏供储赋土田河仓红粟腐漕壤紫台烟民物滋殷阜车书转瘠捐可怜
疆理在运会付茫然

南国昔归顺中原仍戍藩岁分貔虎士阵入乌云屯名籍沦逋窜枢兵失讨论诸君
甘负国故里亦空村

帝患湮洪水人思凿巨河万方劳畚耜列郡困征科处处黄巾社纷纷赤子戈千年
遗恨在铭石写嵯峨

泉货资桑币经纶称物宜低昂三尺法敛散百年规拙甚黄金注淒其白鹿皮纷更
愆祖宪废阁失天威

夜直麒麟殿晨司虎豹关周庐诸子贵枕戟卫郎闲通籍存奴隶连车载匪颁世勋
何补报戎马泪潜潜

世爵推勲阀元戎典禁兵营分龙虎卫势接凤凰城烽火迷千里烟尘犯两京临危
忘勇决何以答升平

黄头称国士碧眼佩天弧突骑今何在风光古所无旧看装宝剑可怕执金吾畜锐思防患谁卫两都

命将图推爵登坛愧匪材舟车空府库金帛散舆台论赏屯膏泽争权稔祸胎旧家零落尽庙算实堪哀

四野悲龙战羣方习豹韬烟尘来滚滚江汉去滔滔云构千章栋风帆万斛艘炎波俱鼎沸何用赋民劳

福极频移柄明良久失图匠材违矩度博局转梟卢宝鼎宗周器玄圭大禹谟万方俱有间九贡近来无

乳羝随敝节帛鴈识累臣渐觉关河壮应瞻日月新威声通海岱喜气入梁秦万骑轻天堑何时一问津

异乡风景切人事见推移冠盖非前日豪华又几时年深鹦鹉草春老杜鹃枝依旧青山色寒云满目悲

世自余蛇豕人犹慕凤麟节旄寒在牧鉞钺暗生尘有梦能归国无邻可避秦几年江海上老泪独沾巾

高卧

冰霜寒序集灯火夜堂深高卧尘侵榻长吟雪满簪空存三寸舌不负百年心慷慨能忘死饥寒亦易禁

初度日

衰疾年添算劬劳思转伤声华江上雾勲业鬓边霜诗继唐风作书从禹穴藏光阴何冉冉华盖郁苍苍

大雪

萧萧惊朔雪浩浩怒天风虎穴先朝事鹅池半夜功中原思将帅乱世识英雄今古兴亡迹乾坤阖辟中

相疑

向国应无计归田屡作期江湖身病日松柏岁寒时老鹤云千里惊乌月一枝人生各有志物态莫相疑

雪

积雪凝冬瑞羣情兆岁登洞门沦径隧宫瓦失觚棱烟火江村猎寒澌野水罨殊方兼久病高卧竟何能

雪霁

江上千峰雪天边几缕霞冻澌依岸梗冰柱落檐花野回山光薄沙明树影斜负暄貂已敝抱病虱空爬

腊月朔

羈客无颁朔穷年有此朝山明仍戴雪水落不通潮黄道环辰极青阳转斗杓仰关

身万里转壑梦连宵

世路

世路难如此京华事若何风云归草昧日月傍干戈南土分争久西秦王气多累臣
独洒泪衰疾卧江沱

同驾

白日行天速青山去国遥昔年苍水佩同驾紫云轺汉节犹堪牧虞旌不待招人生
夸气概莫遣旅魂销

腊日

乡心违伏腊宦迹历关河酥酪分邻粥弦匏拥醉歌天清云路阔春近雪花多事业
今如此江边一钓蓑

戏题

牧地连云水羔羊饱杞椒体充香透骨尾重雪凝膘珍出天厨饌炉传禁脔烧先尝
时有赐况复酒频浇

西域葡萄熟浆醪不用酤色深淙水菊香重塞城酥甘露浮银瓮寒冰贮玉壶相如
犹病渴传赐近来无

闵姜公硕

窃据窥神器人心事事非每闻优诏下无复报音归虎穴宁容饰龙韬未息机小臣
徒溅血不得沃天衣

馆人

风雪夜迢迢探囊失敝貂烛龙沧海阔帛鴈上林遥伏枕调诗律篝灯注酒瓢馆人
情思厚尚觉旅魂销

旅馆

旅馆经时序羈愁转寂寥山空寒隐雾风急夜鸣条塞雪应无际军声自不骄何时
衰老泪拭目圣明朝

春近

颇觉边尘净仍看昼刻添江风寒透屋野日暖窥檐病减寻书帙春来忆酒帘归心
何日遂谈笑听闾阎

积雪

积雪山河净昏霾宇宙迷鴈声来漠北兵气自征西海雾浮龙影关寒愜马蹄时危
增愤结衰病属羈栖

庐岳

庐岳不可极山深宜养恬松巢邻李白菊径似陶潜秀色云千仞秋光雨一帘渔樵
与麋鹿於我更无嫌

阳九

厄会符阳九沉痾阅岁三苏卿吟漠北庾信赋江南山影开晴黛湖光接暮岚艰危
心不展俯仰事何惭

春日得乡信

旅思春江上乡山宿雾中鬓毛难再黑花蕊转添红病减诗囊在愁多酒醖空衣冠
俱散走何地哭途穷

释闷

世乱复为客衰颜对物华江城年节酒野树岁寒花雪岭明残照烟汀带落霞为谁
添白髮何计问丹砂

兵交

虎狼犹构祸四海苦兵交鼓动霜飞剑笳鸣月拂弰川红依壁垒林黑避槽巢野老
仍羈旅何乡可结茅

戒守

戒守时鸣鼙传更夜击刁乱山青拂眼衰柳绿垂髻畧阵楼船壮先锋越骑骁军中
称汉将谁是霍嫖姚

十有一月至于正月连雪不已

气合冰天址光连雪岭西愁来望不极诗罢思俱迷渐冻江淮远昏霾岭峤齐饥寒
春事迫何以慰蒸黎

虚橐

世已声华改身兼老病侵几年沧海梦一旦白头吟旅馆惊虚橐寒城急暮砧固穷
知义命何用较升沉

病中移居

江水东流去庐山北向来孤城新第宅浮世旧风埃久病频移榻多情数举杯乡心
犹未已春色苦相催

扰扰人间世萧萧物外身江山如有态草树暗生春自笑新巢燕谁怜旧主贫旅懷
相慰藉真率见情亲

卜筑

水外十三坡居人总荷戈烟营江树尽霜木陇云多樵爨村村屋斧斤旦旦柯白驹
空谷在何事卜行窝

战士

战士屯邊垒家人问繇爻寒堂悲蟋蟀月户怨蠨蛸巷有招魂帛林无返哺巢干戈
何日洗倒载虎皮包

烽烟

烽烟寒转急丧乱岁难休野老无家别遗畦尽力求关河多骑气江海自渔舟世事
由天运何须涕泗流

舟中

何乡能邂逅天地有渔翁沽酒时曾醉探囊岁屡空衰年双鬓白长日一丝风谈笑
兵戈外兴亡俛仰中

九日辛丑

两度黄花酒尊空思转伤去年留病榻今日复虚檣粝饭依人爨疎衣透骨凉干戈
天意在去住更何乡

羣情

社稷生奇变关河入战图楼前朱汗马城上白头乌国步分光岳江流接蜀吴羣情
思伯业佳气瞩皇都

所思

輿图真混一廊庙乏才贤得失轻千虑奸雄起九廛阴霾迷岁月战地起风烟洒涕
江湖外渔舟白日眠

天意

僭窃千家郭颠连一病夫虎狼相啖噬齿爪及羣孤冻馁民何頼分争霸易图物情
知厌乱天意启祯符

遠客

遠客又遘患其如头白何系舟沙岸久闭户水寒多喜气闻关塞军声接汉沱废兴
知运数海内厌兵戈

鈔掠

鈔掠民何頼孤穷痛不禁江山惨寒色鸿鴈有哀音白髮三年病青霄万里心路迷
尘冉冉肠断暮駸駸

孤舟

牛斗纏兵气江湖隱使星客头元自白天眼为谁青夕照留渔屋寒芜接雁汀孤舟
风水阔百计问柴扃

悲歌

世乱人多暴魂惊客屡过采薇春事远席枯夜寒多凉月侵萝薜清霜看芰荷荒墟
唯痛哭野老亦悲歌

子月午日壬子夜半雷雨

客愁随日度寒律向东排黎庶干戈暴苍天号令乖江雷宵送雨山雾晓生霾安得
氛埃浄春光接泰阶

学言稿卷四

●钦定四库全书

学言稿卷五

（元）吴当 撰

○七言律诗

徐氏园亭

河山锦绣帝城中更辟名园在屋东满地绿阴三月雨数声黄鸟百花风轩楹有席
渔樵对樽酒多情父老同逸兴已无朝市梦相逢往往说年丰

送陈廷佐高州路教授

江州义门天下传君今分教岛云边百蛮俎豆先王学列坐弦歌弟子员鸚鵡园林
春似海秭归【县名屈原之鄉】风雨夜如年宦情莫叹微班冷禄米分时蚌蛤田

送归彦温河西宪使

阳关东出接西凉皂盖朱幡陇路长五郡人烟无堡塞千村部落有牛羊休屠【音
朽除匈奴王号】庭遠曾归汉都尉城荒尚护羌四海輿图真浑一祇将声教答时康

送苏伯修由礼部侍郎赴淮东宪使

东曹礼乐竦朝端忽奏皇华遣豸冠五色文章金匱富九天风露玉壶寒江头画舫
迎潮去海上青山立马看二十四桥春似锦飞花不到使君鞍

看云亭为慈溪匡上人赋

盘结松萝四壁空静看云影坐从容风清时送归岩鹤雨散常依在钵龙野水带潮
微辨树山光敛暮只闻钟杖藜欲去分禅榻知隔慈溪第几重

玉雪坡为周学士赋

曾识罗浮山下树苍茫白石共烟萝几年种玉云千尺镇日花开雪一坡酒熟谷中
春事早诗成湖上月明多青绫夜向金銮直踈影黄昏奈尔何

丘叅军妻守节

紫髯不见旧叅军桓表旌门墨色新云雨几时同穴梦冰霜百岁未亡身香奁有泪
迷鸾影锦瑟无声落燕尘萱草堂前今种柏翰林留记写精神

保定王氏母九十得赐帛乡人合燕为寿

皇家赐帛出郊圻王母光荣九十时仙露酿成千日酒春风来自万年枝旧颁官诰
从兒贵新制恩袍与体宜已是八荒开寿域城南咫尺接天墀

送毕氏子韶州访翁李知事

蜚雨收岚海气凉陇船迎浪粤山长杜鹃乱叫杨梅熟鸚鵡低飞荔子香筹幙望云
依北极琴台延月对东床宫岩石乳■〈月巳〉于玉服食应须遠寄将

赋梅竹轩寄太史杨公

湖上开轩接浪波映阶梅竹更婆娑润留翠黛春云合寒入水绡夜月多嘉实可供
调鼎餽长竿终自伴渔蓑清风三径人如玉越水吴山奈尔何

送刘成德之京师

玉溪杨柳绿依依新着丹袍陟帝畿江上马蹄春蹀■〈足爕〉日边龙角晓依微
禁墀香近神仙佩御苑花开锦绣围亦欲乘槎问星使祇愁老却故山薇

题桐木韩氏族谱

韩家相业当时重盛德名昆集鳳池章佩并县金错落宣麻同拜玉淋漓梧桐春雨
江南梦松柏秋风海内悲孙子尚余宗谱在更传遗事后人知

杨公明徐志可贻诗次韵荅之

几杖曾陪上玉京几回聴漏酒初醒琳琅春盃朝天佩云母时开迎御屏银瓮赐余
莲子白金鱼恩重荔枝青不才犹欲承先泽樗散何堪辱在庭

南州榻在长留客北海樽空未易醒台馆四时如锦绣云霞长日作帷屏桃成秋实
千年碧橘待霜肥万颗青闻说临池多逸兴笼鹅时与换黄庭

宋蕲之广济簿尉黄刚中修水人也至元天兵渡江中十九矢而死妻刘被掠子甫
十岁既长求其母凡十年知己没入官迎驾哀诉得旨使为母子如初

临危百箭忠臣血流落孤踪孝子心霜露年年秋草碧关河处处暮云深仰天已觉
恩如海爱日常懷泪满襟继述好留青史传凄凉更赋白头吟

环青堂

黔南泉石尽烟霞幽夔偏宜隱者家四坐春山有秋色一川流水见桃花樵歌窈窕
穿云去眉黛婵娟对日斜更说官闲松菊在芒鞋应许踏轻莎

翰林上直次周伯温韵

宫庭白日静相宜铃索无声漫自讥云近帘栊秋影薄香飘殿阁晚风微典谟事业
千年册黼黻文章五色机每叹小臣懷补报寸衷何计達宵衣

金鸭香分石鼎茶日长宫署寂无哗庭前草树皆生意壁上丹青有岁华禁直夜凉
初赐被讲筵秋近又宣麻神光郁郁冲牛斗河汉层阴莫漫遮

史院秋祀三朝神御殿用郑编修韵

银烛金莲禁署深香飘秘殿碧沉沉鼎湖弓剑千年在黼座衣冠五夜临帘外雨云
飞野鸟殿中燎火起巢禽悲丝急管俱增感谁识朱颜白髮心

彦修秘监作亭阶前栽竹一个名一竿亭咸为赋诗

公子孤标絕世奇亭前栽竹静相宜苍龙垂影云千尺翠袖临风玉一枝特操不随
春色改高情只许岁寒知江头留得扁舟在何日从君独钓时

送达天山融州太守

五马翩翩渡五溪玉融更在桂林西连山晴黛分岩洞列戍昏烟迭鼓鞞陇上梅花
无雁过庭前榕叶有莺啼使君自是金闺彦暂为分忧及遠黎

宜春盘龙寺

岩峯三十六盘通塔殿高低翠谷中传法有宗僧业白安身无语佛灯红松杉种得
云千本泉瀑飞来雪半空最喜老龙泓下卧肯将霖雨致年丰

蓬轩

幽居轩檻越江边鸿雁鳬鹭在目前春涨还如天上坐雪时浑是剡中船一枝梅月

寒堪画几树松涛夜不眠总把平生湖海兴斫鱼酹酒赋诗篇

史馆上直次王应奉韵

玉堂高迥不宜冬古木回廊浩荡风华盖紫微天咫尺泰阶黄道日当中捷书迅急
时间奏退食从容每自公衰晚腐儒何补报祇须制作示无穷

送谿善上海道万户

帅符新拜紫髯翁国饌深贤转漕功海水八荒浮地轴云帆万斛动天风东吴民力
今时困中土军储昔自充报政归朝叅大议经邦事业属豪雄

筠庭

老屋城南倚翠屏萧萧修竹满前庭笋因夜雨侵苔长枝共春云覆檻青深处石闲
留客坐隔林莺啭抚杯听故人诗句应题徧藜杖何时一叩扃

次韵寄福建魏廉使

御沟水泮水初流绣斧朱幡上彩舟北极关河真壮观南州风物总离忧花明苑树
莺声晓枫落吴江鴈影秋眷注定知宣室召归来应得从春遊

浮云道院

道院孤高古翠微满间山气静霏霏晓随白鹤迎风出春共苍龙作雨归浮世纷华
空在目闲情舒卷自忘机无端却上蓬莱住五色成章向日飞

鸡山隐居

自是山深好隐居白云千亩在庭除鳬飞每候仙人舄酒熟时停长者车春尽草根
俱是药秋来柿叶总堪书旧家猿鹤多生怨久欲从君卜里闾

代祀过信州苍岩貳守貽诗次韵以谢

羣飞凡羽见孤凰胸臆皆成五色章奕世公侯存故国先朝相业踵遗芳银箏自度
新调曲金鸭时焚旧赐香惭愧相逢即相别江东云树寸心长

上都秋日登眺

客里年光似水流满城砧杵动羈忧沙头白露牛羊夕塞上黄云鸿鴈秋千里关河
通王气两都宫阙壮神州多情不用悲摇落更为斜阳独倚楼

环翠楼

碧梧翠竹倚孱颜故筑层楼与客攀劒气每留星汉上山光只在雨帘间娟娟晓日
开眉黛蔼蔼春云拥髻鬟便欲买舟江海去杖藜应许叩岩关

鳌峰石

鳌峰石在玉堂前近与蓬莱御阁连积润出云秋漠漠孤根承露夜娟娟土花剥尽
生光怪海峤移来阅岁年艮岳遗墟归草莽金题犹识旧时镌

上官氏南楼

层轩百尺倚高秋萧爽浑如庾亮楼云影每依帘侧畔溪声只在树东头仙人岩石
通霄汉太乙藜灯直斗牛总道登临多雅兴何时借鹤试相求

东安陈氏慕亲堂

城外云连郭隗台草堂寂寞傍坟开碑铭有字人常读宰树成行手自栽
寒食出哺乌晴逐夕阳来百年霜露无穷思击筑酬歌总是哀

坦明堂

东南佳丽独钱塘君向青郊结草堂几曲云山分野色满池秋水纳天光
松阴落处琴书润柳絮飞来枕簟凉衮衮京华尘土梦好因鲈鲙踏吴航

戴宣使以差出建康因得过家

杨柳新条拂酒杯都门望望百花开元臣建国罗羣彦使者宣劳出上台
云路渐看华盖逼乡关初见锦衣回此行不为鲈鱼鲙莫待秋风击棹来

李氏义聚堂

锦里堂成聚弟兄门门雍睦见仪型桑麻绕屋春千亩风雨连床夜六经
折去荆花依旧紫种来慈竹镇长青贻谋更有无穷感时向尊前赋鹄鸩

萧闲外舍次许可用承旨韵

东郊结屋川光近内相题诗墨色新庭草常留青鹿卧渚云惟许白鸥邻
傍帘种竹秋声近带石移花夕露匀野马尘埃浑不到萧然门巷自家春

顺存堂

龙泉江上卜幽居题扁当楣学士书堂下白花吹采凤窓间锦瑟咏关雎
猗兰有态春云近棣萼多情昼日舒朋酒升堂家庆在相看不乐更何如

至日和仲宝大学士韵

御宸当阳扇影回乐声齐起殿前雷行天黄道常依日报国丹心未许灰
金锡袞衣归黼黻琼楼玉宇尚崔嵬谢安再为苍生起调化真宜法斗魁

墨梅

粲粲冰肌雪未皴萧萧疎影写黄昏情深西子湖边树梦入罗浮月下村
万斛春光归笔力一枝云气沁香魂清江寂寞杨丞遠无限风流此日存

黄隱士相过次韵

吾家华盖郁嵯峨数亩蓬茅长薜萝愧我菲才宜隱退知君有道幸相过
风清杖屨迎岚出春尽犁鋤带雨歌架上有书尊有酒相逢不乐又如何

和虞先生寿京师贾姑诗韵

慈颜九袞鬓如鸦世族前朝宰相家天近县官时赐帛春深孙子日扶车
麻姑酒是长生药阿母桃应几度花学士诗成无限思五千里外望京华

送陈道士奉香归四明

暖烟芳草路迢迢又送天香下九霄洞口桃花春欲笑山头桂树晚难招
麻姑酒榼藏丹室徐福楼船驾海潮何日乘桴遠相问詎应无地老渔樵

聽雨堂

兄弟多情有别离昔年惆怅大苏诗青山听雨相思处白日看云独坐时慈竹绕檐
春瑟瑟梧桐当户夜迟迟投簪未觉归来晚尽散囊金对酒卮

强仲贤赴广东师帅幙

元戎分阃握兵符筹昼须君答庙谟千里车来天北极五羊城在海东隅香云荔子
丹砂颗清露芙蓉锦绣图早立勲名重邦国莫令妖气傍江湖

九日燕南禁酒简赵子威金宪

又与黄花负夙期天南霜露满人衣酒尊有禁逢佳节纱帽无情对落晖俯听秋声
从树起仰看云影送鸿飞登临不用增惆怅咫尺承恩上紫微

燕南龙兴寺阁晚眺

倚天楼阁贮金仙层栋犹题赵宋年混一南方今宇宙英雄百战旧山川鱼龙水落
秋江外刍牧人归夕照边总为悲歌生慷慨憑阑极目思凄然

关西道士求赋雪巢

一间素壁倚秋风却拟巢林雪半空炼得身形清似鹤望来剑气白于虹洞箫窅窅
留云住牖户绸缪许月通更识船如天上坐孤飞只合剡溪中

上巳日次韵

忆昨追随苑外车风光九市见纷奢并兕玉带双龙佩燕女金袍五凤花天乐声高
仙仗肃宸旌影动禁林賒当时讲席尊诸老人到于今喜诵夸

欧阳建寅赴松江巡检

京华久客宦情微身到江南即是归虎士刺船迎逻鼓鲛人停杼望云扉蒹葭夜月
风连海秔稌春云水绕围自笑白头犹恋阙何时五马借光辉

次赵伯友韵

白髮衰翁怜病久青春遊子叹归迟感君曾奏匡衡疏懷国长吟杜甫诗苍海鱼龙
仍袞袞孤城花柳自熙熙千年遗恨同谁语百世高情与尔期

百年道脉细于丝长夜漫漫待旦迟先进常从周礼乐专门仍授汉书诗微躬独步
思绳武大介重光仰緝熙已忍凄凉成病久寸诚惟与古人期

遊西湖承天寺贈月潭上人

中天台阁禁城西春日遊人出御堤满地落花驯鹿卧千条弱柳乱莺啼窓涵水影
金鏤净旛倚晴云絳节齐最喜上人能爱客乘船仍约酒频携

宋枢密权公葬婺源之麓八世孙居都昌者作楼以望其丘陇于千里之外名曰寓
思虞学士尝为赋诗今楼已废矣九世孙緝来求余诗赋此

异乡丘陇近蓬莱层构当年望眼开千里江山遗刻在百年霜露遠孙来已无化鹤
归华表空有饥乌下碧苔寂寞孝思何所寓断云衰草两堪哀

九日紫极宫次戴懋和韵

老去杯慳易劝酬年年挥泪望神州鳳凰城阙金汤在龙虎亭台翠輦遊牛斗寒光

通紫极蓬莱弱水隔玄洲乌纱不受西风急高阁凭江倚素秋

忆昨追遊禁苑寒陇头红叶醉中看青蒲曾伏麒麟殿白髮能胜獬豸冠天上玉堂
惟有梦田间瓦缶竟无欢殊方久病悲摇落笑啜茱萸强自寬

次韵寄康宗武

一自承恩乞鉴湖几回清梦谒神都蒲萄天马穷边徼杭稻云帆转越吴旻谷吠晨
惊蜀犬神祠鸣夜谿城狐隆中高卧空筹策万里云霄羽翮孤

燕处会灵宫次姜步惠韵

江上烟岚接地阴仙家庭宇自云林玉堂金马成尘梦草服黄冠称野心沧海鱼龙
秋水落瑶台风露夜寒深肯从世外寻丹诀何事人间叹陆沉

移床【九月十日】

伏枕移床入小舟江头渔父问何由风涛接棹鱼龙冷烟草迷津鴈鷺秋往事几年
谁内顾狂澜百折自东流草玄不守扬雄宅垂白空添宋玉愁

九江冬至日

愁坐孤城对日长葭灰动处识微阳八方云物瞻新候几树梅花忆故乡黄道春回
天北陆紫烟时想殿中央频年鳳歷催颁朔曾挿金貂侍玉皇

次韵示从学

东度关山马迹长南浮江海鴈随阳丹书玉篆发天语金节绣衣辞帝鄉放臣泣血
竟何益羈客哀吟殊未央故园云谷杂豺虎寒木何枝依鳳凰

高昌喜山近仁在江州为太常院使礼部尚书新其堂构各有名扁为赋三题余未
暇也

江上小堂仍种竹浑如一棹住江间芙蓉秋水三千顷翠黛春云十二鬟鳳管制来
新谱在渔竿留得钓丝闲牧羊庭遠寒无树裘马轻肥客未还【右筠艘】

冥鵙化翮向南飞栖息安危各有时秋入梧桐晴影薄寒通牖户晓光迟青山是处
瞻龙气紫阁何年覩鳳仪自叹蓬萊常五色上林曾宿最高枝【右云巢】

飞花如席拂庐低不辨行踪径已迷竟夕有书分户映几年无榻见岩栖秦关拥道
难容马汉节禁寒尚牧羝曾忆钓蓑归旧隱洞天高与白云齐【右雪洞】

九江杂咏书懷

百年头上着乌纱一日江邊踏钓槎病似相如空有赋贫于杜甫更无家渔竿处处
蒹葭月樵笛村村踣躅花旧业已随兵燹尽青门擬学邵平瓜

天地无情泪眼枯故园松菊久荒芜秋风茅屋从谁葺春日村醪只自沽万里关河
迷宇宙孤舟烟雨满江湖渥洼老骨空相顾云汉高飞不易呼

冬至后九日

绣牕添线管浮灰玉烛迎阳晷影回鴈度关河随朔气龙依江海蛰神雷渐开柳眼
窥春色未放梅腮送酒杯药裹书籤随处有鄉心岁事漫相催

次韵寄友

旸谷东飞陆海灰灵杓北顾帝车回波涛寒涌江间月草木春移地底雷九奏钧天
犹梦乐十洲弱水不胜杯山楼笳鼓时时急晏岁冰霜日日催

几年野烧着寒灰此日楼船向海回万迭云烟秋似黛一江风浪夜如雷歌残玉树
浮空棹梦入金茎渴露杯想待上林花未发春光应得鼓声催

立春日

年年此日客殊方谁拟今年住九江花鸟春愁诗漫兴乾坤元气酒难降乡心华盖
云千里病目匡庐雪一窗到处青山薇可食老来何必泪双双

除夕有感

渔竿长在楚天涯龙节虚随汉使槎世路风尘迷杞棘故园烟雨忆桑麻两行泪对
椒盘酒一树春生蜡炬花人事乡书俱寂寞不堪江上鼓频挝

华盖芙蓉翠倚天高堂彩服忆长年家人共守迎春酒童穉争分压岁钱香雾暖浮
金鸭动蜡虹舂隔絳纱然鹤书一去无消息白髮沧江对雪眠

辛丑元日夜坐试笔

扶桑晓色压春云江上香炉留夕曛坐来白日有佳兴雪后青山无垢氛蛰龙三冬
成久卧鸣鸟百年今不闻遗经独在共谁语太乙吹藜来夜分

赠聂克敬兼简宗武

岁晏匡庐积雪深高松老鹤苦能禁海尘杳杳生春态江水沄沄流夕阴无事庾楼
留客赋向来梁甫为谁吟渔樵旧侣如相问鸥鹭寒盟尚可寻

夜月

处处关山泪眼明悲笳又送断肠声芙蓉水冷秋无际乌鹊枝寒夜屡惊黄道帝车
还北极紫垣天驷接南瀛多情不用悲摇落万里江波月夕清

七夕大风

江头风急客衣凉瓜果谁家月满堂五色在天曾补袞七襄报日不成章机丝停杼
空成绪星汉乘槎竟杳茫自叹红颜今白髮人间养拙更何乡

次韵荅权纬

江湖波浪接鵷溟牛斗光寒动客星兰芷风暄谁结佩芙蓉水冷自扬舲周官礼乐
先王度汉代文章后世型衰病独怜头尽白故人相见眼终青

赋樊氏茅屋

闻君茅屋住樊川水影山光接几筵花径约来寻酒伴柴门系着钓鱼船晴檐兴在
从谁赋秋树高风只自编亦有数椽华盖下杖藜何日白云边

赠刘懋观写真

萧萧霜鬓隔风尘却有刘郎为写真金马玉堂成昔梦苍松白鹤伴闲身伤心南土
衣冠少极目中天日月新更许苏卿老归国便应黄阁画麒麟

送人之西涧山长

巍巍宫庙涧之西松桧萧森夹殿齐白屋衣冠存伏腊青云步武见阶梯江湖夜月寒惊棹桃李春阴雨满蹊昭代急贤无枉路未应重席叹羈栖

老士安治书为使江东时尝构叅云亭在京师属赋之

叅云亭在宛溪头持斧仙翁昔所遊日月星辰天北极山川草木地南洲门前车骑秋来好竹上题诗醉后留回首江村烟树阔至今犹忆旧风流

玉堂公宴次周学士韵

扈蹕新随帝輦回宾筵秩秩玉堂开禁庐下直辞天仗内使传宣送御醕舞女分行花影动歌工闲奏鼓声催衰年感遇惭无补頼有诸公济世才

冯氏藏书堂

乔木依堂数亩阴买书不惜散黄金简编总许儒生读碑帖还从墨客临芸阁牙籤晴灿灿练囊萤火夜沉沉只今许下多贤士始信君侯惠泽深

邓汝贞买妾得子南归云林

云林三十六峯齐独振京尘向旧栖天上桃花新结子水邊杨柳已生稊浊醪对客秋三径啼鸟催人雨一犁亦欲投簪江上去为君移棹过金溪

赠日本诗僧

偶来金阙信相从笑指扶桑浴日红处处写诗扬海屿时时飞锡振天风归云每共经函在行橐常因酒醖空吾道获麟惟掩涕乘桴相问有谁同

次韵荅康宗武胡伯文

百年勲业鬓星星又聽流莺綠满庭茶与仙人分石鼎酒从豪客索银瓶一犁春雨苏公圃半曲湖光孺子亭更肯烟霞空寂寞未应尘土叹飘零

留岩峯寺

扁舟飘泊苦西东此日栖迟野寺中岚气常疑庐岳雨秋声还似大江风辋川花木图犹在杜曲茅茨赋未工人事萧条乡土近几时回首白云通

岩谷风多秋叶飘一径荒草凉萧萧已无幽芳媚野色惟有老树存高标青山冉冉列鬢黛白日往往逢渔樵仰天长叹竟何补荷蓑长歌谁可招

次韵寄鄉友

伤心一视天无外病目长懷日再中猎骑合祛云梦泽楼船直驾海潮风二仪高下悲人力万类枯荣识化工衰晚祇慚何报补艰危终不拟穷通

风尘冉冉似蓬飘犹有衡门拥艾萧锦里几家红叶树华峯千仞碧云标晓因童子坡头牧夕约邻翁谷底樵秋月春花随地有归来莫待楚辞招

南溪精舍

前代遗墟洊水上南溪栋宇见新题开山种药云千本傍舍移秧雨一犁白鹤时从檐下宿黄莺只在竹间啼尚方近觉声华起却向金门聽晓鸡

挽余忠宣公

沔阳舟楫势如飞安庆孤城屹不支
诸葛智谋天地閼杲卿忠义鬼神知
纵然身活到今日未必人生无死期
一片精忠元不改男儿到此是男儿

学言稿卷五

●钦定四库全书

学言稿卷六

（元）吴当 撰

○五言絕句

题古木

铁石皆生色冰霜有岁华
春雷龙启蛰星汉客乘槎

天台玉汉桥道院八咏

玉溪桥

玉溪浮采鷁金锁贯晴虹
自是知津者能成利涉功

积果堂

几树枣如瓜千年桃始华
渠通沧海水门倚赤城霞

十二区

拣地循环种名花取次开
藏春何待坞按律且衔杯

梅竹庄

天香生玉树云影动琅玕
对酒惊春事开门识岁寒

缉云亭

琴罢月生渚鹤归松满坡
葺亭无尸牖应是白云多

招隐亭

书从北阙上文自北山移
樵牧俱生怨耕锄已过时

渊泉亭

秀出千黛螺飞来半空雪
天光净亭亭秋声来淅淅

外墅

山光分远近云气异朝晡
过客俱能赋开轩即是图

秋山山景图

茅屋倚秋树山楼延夕曛
流来桥下水半是洞中云

漉酒图

头上巾堪脱尊中酒不空
衡门松菊在归卧北窗风

画龙

天用莫如龙渊潜閼神功
一朝起平陆八表皆雷风

梅月窓

曾到西湖上闻香不见梅推窗窥月色竹外一枝开

○七言絕句

青山絕处楼扁

中天隱隱碧芙蓉楼阁深藏第几重松叶满山行迹少樵夫聽得讲时钟

赤壁賦画图

水落江潭月满汀秋光一色漾空青长歌窈窕吹箫者祇许飞来白鹤聽水芙蓉

絳綃新制舞衣裳翠盖亭亭度晚香祇恐君王恩易改夜深风露不胜凉画红梅

西湖月淡彩云飞睡脸生霞酒力微谁道玉楼寒起粟臙脂却染素娥衣
王继学賦柳枝词十首书于省壁至正十有三年扈跸滦阳左司诸公同追次其韵
滦阳杨柳长新枝无奈春寒力不支燕子归来风渐软却似宫腰学舞时
晓来岚气不成霜云染烟笼万缕长醉归谁敢争驰道尽与君王控马缰
树绕离宫草共青树底旌旗朝露零宫娥起伺羊车过林梢斜月照华星
宫柳添来几百株谁复天邊种白榆马上贵人通国字时折新条作笔书
神京高寒春力微晴絮飞时花尚稀忽忆钱塘斜日岸箫鼓画船扶醉归
陇头春深未识花酒帘动处是谁家郎来莫折门前柳昨夜东风初长芽
新赐金鞍选日骑玉钗斜插两鬟垂长条拂着珍珠帽只许东风细细吹
江头樵牧昔年逢结茅临竹更依松柳条系得渔船住长日醉眠谁问依
綠阴芳草思凄凄六宫传蜡暖烟迷沙堤不种隋家树谁忆曲中乌夜啼
貂帽驼裘休叹依从官车骑莫从容柳花飞尽雪花起纔见西风又似冬
潘子华画上都花鸟

冰泮东风鸟力微暖云将雨湿芳菲不知天上寒多少谁剪春罗作舞衣
观弈图

仙人棋局静忘机松下灵芝似玉肥樵客归时柯已烂云间谁制芰荷衣
闻桂道人

八月天香满界飘广寒宫外影萧萧不从玉兔求残药却与云山伴寂寥
掀篷图

清江杨丞天下奇每能拈笔写横枝暗香疎影黄昏后曾忆掀篷对月时
送人归清江省亲

遠树惊寒线在衣西风吹雪作花飞清江碧嶂秋光里不为鲈鱼也合归

大驾南归至龙虎台迎候者皆于昌平胄监岁馆旧县何氏至正九年八月监丞吴
当独来馆人持祭酒司业旧题索賦

当关龙虎拥层台此地年年翠輦回八月千官瞻候日旧陪词馆小臣来

尔家门巷自清幽新辟轩窗许客留北望居庸天咫尺白云红树倚高秋
赠淮安屯府从事

长淮木落正纷纷从事衙书逐鴈羣八月江寒鱼似玉列屯秋净稻如云
挟弹图

平沙浅草雨初干时见飞花到马鞍花树止留巢鳳鸟王孙何处试金丸
云林亭

幽亭古木净萧萧江月云山遠莫招昨夜西风吹梦去共谁相对说渔樵
宣和■〈〈今上西下〉鸟〉鶻

九重拈笔写清秋草底微禽亦见收回首故宫花石外离离禾黍不胜忧
孙氏孝义

倚庐常近墓人家种树留巢返哺鸦门外桑麻春几顷东风开遍紫荆花
携琴图

偶因秋兴携琴去古木苍藤何处村行过溪桥山路合白云千亩不知门
蔡氏藏先世诰勅

无复前朝旧典型百年文物尽凋零蔡家孙子风流在爱惜黄麻似六经
息斋竹月

苍龙翻石湿云交鸣玉参差出鳳巢翠黛晓凉香袖薄一钩纖月在林梢
赠墨工侯务本次虞学士韵

御床玄壁进龙香奎阁当年诧豫章此日侯家新制作采烟凝液总仙方
窓下云英透纸香白头惭愧恋文章玉堂天上成春梦珍赐何时出尚方
画鹤

云汉寥寥雪羽毛海风吹月倚秋高石田瑶草俱情思时见临池一吮毫
觅盆梅

病中犹未见梅花何日尧夫驾小车为觅小盆分少树东风如到野人家
竹枝词和歌韵自扈蹕上都自沙岭至滦京所作

沙岭风清宿雨多白云如雪夜陂陀涧泉十里九曲折北向天边作御河
雨过平沙不染泥彩索凌风御帐齐宫臣报道晓寒浅有个黄鹂深树啼
宫车调得马蹄匀细草轻风不动尘织成翠羽垂珠幙缕就黄金结绣茵
露下穹庐暑气苏卧看织女映黄姑山泉响似江南雨林下不闻啼鷓鴣
马羣弥野草连云当年玉帐度秋春迎日捷书频送喜内间赐与出金银
羽猎长年从翠华麋鹿生茸草茁芽射得黄羊充内饕更喜江南新贡茶
果熟冰盘进御黄秘殿挥毫对日长元臣补袞应无阙新赐宫衣自上方
殿头云气尽成龙水晶帘影散高春阿母传杯池上宴帝子吹箫月下逢
霓旌移仗藥珠宫云母屏门不隔风花外侍臣成久立听得新歌乐意同

青宫受宝朝贺日次韵

百年文物际重熙丽日祥云昼刻迟上相传宣催草诏看君落笔玉堂时
殿外霓旌漾晓晖炉烟浮动袞龙衣瑤楼贝阙天中起五色云霞在翠微
天乐声中舞序陈千官花外驻车轮春宫初试黄麾仗宝盖珠幡队队新
綠树重重秘殿阴画堂甲观九重深青宫昨夜初承诏丹宸今朝又进箴
日出苍龙紫雾开金门宣赦近臣来书条字字皆宽大万姓欢声动地雷
大安高阁正当中龙虎旌旗卫两宫近日春坊谁辅导相君班序冠三公
禁直周庐接上台银河秋傍紫垣来为郎莫笑冯唐老立马金门待晓开【时以礼

部郎中在上宫】

宫臣侍侧近炉熏衣上龙乘五綉云鸣玉锵金俱鼎食早思偃武与修文
殿阁熏风奏舜弦大明宫树不凝烟圣人恭默惟思治日厯憑谁细细编
深宫无处不开花玉烛调阳运帝车不是人间春易老风光长只在天家
自然亭

盘结松萝覆顶青云山四面作帟屏秋风棋局无人看夜月琴声有鹤聽
九月十日出城

病耄犹知发出狂卧嗔恶少强移床丈夫死义无悲泪市上傍观为两行
出湖

鸿鴈声低日已晡扁舟渺渺出平湖何时却为鲈鱼脍写作寒江独钓图
十六日舁床入城

舟子舁床入市廛病躯仰面看青天不知城郭还何似聽得行人叹昔年
谩成

豫章城里聽秋风却向匡庐去住冬白髮数行非俗骨青山千仞有云松
十洲麒麟落江湖遗老相逢说旧都春日琼林看锡宴天门金榜聽传胪
昔年策士奏题名西内传宣御仗迎金织承筐懷旧賜白头何以荅升平
战骨生尘塞草长将军已拜右贤王节旄落尽苏卿老渤海沙飞尚牧羊
霜月横空鴈不眠夜寒邊燧尚传烟伤心江上垂纶客不为鲈鱼系钓船
杂咏

江头雄锁控东西长叹忠臣效节时满目山川天险在不将版甬虑安危
忠臣【谓太守李黼】

万里江淮接楚舒连云楼櫓见储胥睢阳不独张巡死汗简应留太史书
宪使储布哈守楚元帅余阙守舒

万方海宇一封疆郡邑胥豪玩宪章寂寞荒城今第宅家家故牖满新墙
败苇萧萧故垒秋江山如画一渔舟怪来不起临濠兴病久愁深泪易流
庐岳层层耸碧空仙岩佛塔白云通几多楼阁青红地尽在寒烟野蔓中

咏懷

昔贤讲道秩宾筵五老香炉藹紫烟前代衣冠今寂寂故溪风月自年年
先子讲道濂溪书院今四十余年

关雎麟趾久无声谁共周官识治平独抱遗经身已老空山落月梦魂惊
江头风月夜萧萧旅馆寒灯共寂寥三月病来忘肉味九天清夜聽箫韶
春雨黄精似玉■〈月巳〉东风漠漠紫山薇饥来白石还堪煮自叹时人服食稀
柳外郊墟旧战场寒芜秋磷暮云黄渐看三月莺花里陌上新苗陇上桑
先忌日

云谷烟村事事非鳬飞不到鴈来稀楸梧几个人千里不独今朝泪满衣
观大明殿图

大明宫阙五云端簪笔趋朝老从官白髮十年江海外人间写作画图看
读史

周业凌迟伯失宗纷纷功利起衡从时君不识真王佐卿禄宁辞十万鍾
牛酒争迎暴已除沛中屠販漫高车鸿沟更举真筹策圯上功成一卷书
受命趋关定约时鄴翁多算竟何为可怜空碎鸿门玉天下雄雌亦易知
灭仇报主已成功还定三秦众策同西楚能存韩社稷赤松无迹到关中
四海为家辨本支大封同姓奠邦基留侯漫使储君固遗毒无端及爱儿
女祸几令社稷危安刘一语已先知良平无术强根本功在诸君左袒时
盖世功名意气雄楚齐国大势难容从容进退知天道一邑封留事赤松
先汉雄词后世无子云学业冠西都大醇难掩终身玷直笔凄凉莽大夫
草罢玄经雪满头美新兴颂不深谋千年遗恨曾投阁金谷何人肯坠楼
桐江波上有渔蓑东汉流风节义多大器已移名独在犹将公论作干戈
九夷辟地识遗贤白帽端居木榻穿卓行至今推有道建安词藻漫流传
天自西倾水自东三分割据识英雄仲谋有子曹郎在盖世功名仅汉中
一方僻险控孙曹兵术相疑治道高尚父鷹扬身未死詎应典午得称豪
六朝才气苦厌厌归去辞高义独严忧世乐天真有道千年处士晋陶潜
礼乐

束帛难招鲁两生奉常绵蕞乱纵横满朝将相轻年少治道难因礼乐行
伦纪无章古道昏哇声乱耳詎堪论千年不覩真儒效空忆河间礼乐存
连旬大雪

瘦骨棱层病未安江天风雪夜漫漫布衾铁石浑无寐难得梅花入梦看
平施翠壑与丹崖风磴云门处处埋直待东风花尽发却寻布韞踏青鞋
可叹

忠义曾书宋两都一时直笔共描摹万方顺逆苍天在遗臭难称莽大夫

汉水生波郡邑墟空传楚魄
江鱼前年节钺秋江上满纸祈哀逐客书
碧桃红杏艳阳天礼聘相期举按贤肠断关河时
聽鴈琵琶却在卖茶船
漫题

上林高处鳳凰栖羽翮垂云五色辉
黄竹雪深梧影落山鸡临水照毛衣
日出扶桑海不惊曾将巨钓掣鯢鲸
一蓑回首秋江上卧聽兰苕翡翠鸣
香炉峰色白巉巖黄独无苗雪满鑱
燕子经年江上别东风回首聽呢喃
五老峯

五老峯前雪未消烟嵐染处夕阳饶
沽来尊酒寻梅树钓得江鱼上柳条
立春日感旧

南楼譙鼓北楼钟楼外泥牛彩仗丛
黄道泰阶春浩荡苍龙观阙晓曈眈
麒麟烟树鳳凰毛列侍趋朝礼独劳
中使传宣排内宴御园春动乐声高
春盘生菜翠如丝内赐金旛映白髭
前度桃花何处去故园花草不胜思
照眼榴花酒入唇愁颜衰鬢又逢春
御沟水泮河鱼美惆悵江波有钓纶
春思

虎迹烟村少室墟羊肠尘路太行车
上林应射春归羽江海累臣有帛书
除夕

几年别却帝城雉种树书传郭橐驼
华盖芙蓉秋色里钓竿犹伴旧时蓑
与同馆戏续前韵

东驱海若百年雉尚度龙沙几两驼
春雨莘郊留负耒秋风渭水起渔蓑
燕歌赵舞国人雉塞下牛羊塞上驼
烟草随营飞猎骑毡城无地挂耕蓑
紫髯都护气降雉姬妾毡车橐駝
马拥浓於燕市酒貂裘多似野人蓑
金目横戈夜进雉锦幪负轂晓鸣驼
灯前尽理朝天佩林下谁缝钓雪蓑
仪鳳青娥杂戏雉肉峯翠釜荐珍
驼碧桃天上云千树白髮江头雪一
蓑未踏猖狂举世雉长安紫陌望铜
驼陶公门外犹存菊严子滩前不解
蓑尘眼争看楚俗雉书灯独对汉时
驼歌声无复渔家傲处处金章换绿
蓑赤子妖成絳帟雉皇都尘接紫关
驼故人风雪谁聯骑野老江湖独拥
蓑蛮隶横过絶类雉海艘任载岂烦
驼杜鹃花外春连屋布谷声中雨一
蓑梦登书阁

匡庐晴雪自■〈山赞〉岷万里清江
一棹寒自笑老来情思别九天楼阁
梦中看咏归

看云不用买山钱带雨宜翻种秫田
白髮数茎非故态青山何日是归年
荷花香里白鸥飞绿树浓阴拂石矶
一枕清风长夏簟云邊何日钓船归
稻畦黄处树多红山色嵐光紫翠通
茅屋数间流水外一丝何日对秋风
苍松翠竹映溪沙溪上寒梅树树花
十月瓮头春酒熟杖藜何日到山家

讲议

山城马足动红尘杂沓晨趋服色新
绵蕞草仪谁所具伤心半是大廷臣
长生院作寿

蓬莱云气合从龙肠断关山几万重
水落城空山未晓长生院里鼓逢逢
天秩民彝不可磨伤心蚁穴与蜂窠
无端紫绶红尘里犹说先朝第几科
李节妇田氏

仙李移根雨露边青春江汉共风烟
千年事往蟠桃熟黄竹歌传阿母筵
绿鬓飞蓬四岁儿寒机对月夜眠迟
碧梧翠竹春云合斜日慈乌返哺时
江上莺花满目春冰霜皎皎百年身
自从破镜留孤影锦瑟无声落燕尘
朋酒升堂着舞衣忘忧草色动春晖
贻谋曾授三迁教断缕犹存旧织机
廉耻风移士节隳壶仪犹足正民彝
世情无限伤心地惆怅琵琶掩面时
中秋对月口号

古木昏鸦接翅飞扶桑顾兔倍光辉
广寒梦到嫦娥殿新剪红霓制舞衣
静听新人笑语声天寒翠袖若为情
举头不辨山河影坐看儿童闕眼明
豫章城头百尺楼三年明镜照人愁
五老峯前秋色里寸心折尽大刀头
归舟湖中梦至上都

归舟日日向南风积雨初收浪拍空
梦入龙冈清暑地夜凉万斛水晶宫
八月二十四日

丑夜城头烈炬红数声笳起戍楼空
江山如旧豪华去无食无衣一病翁
宣圣庙

百年如见鲁灵光一炬堪怜瓦砾场
秋水满池门独在古槐依旧带斜阳

丑月六日见迫趋升抗论力争复縶于小舟
龙开河口累夕惊风怒涛中六日夜至
十有二日大雪沍冻病卧赋此

长夜漫漫雪一篷有衾如铁卧如弓
窖中犹拥胡姬暖未信当年属国穷
曾忆黄河守冻船鱼肥肉美酒如泉
半生辛苦成何事衰病饥寒雪里眠
朱矾除夕

骇浪惊风动楚天乡心羈思漫年年
鲈鱼不受寒江钓今夜朱矾雪满船
即事

繁华一夕怨西风金鴈钿蝉镜影空
咫尺关山春梦里桃花又向别人红
衡山春遊图

鴈书不到祝融峯怅望苍梧驻六龙
尚欲暮年專一壑白云深处寄行踪
学言稿卷六